



增補甘泉縣志

函伍

ル 5  
3144  
5





門 儿 5  
3144  
卷 5

增修甘泉縣志卷五

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

世紀

續志考正世紀一門皆揚郡統事掛漏特多亦姑

就前府縣志采掇其文義舛誤甚者略摘之

魯哀公九年秋吳城邗溝通江淮 春秋左傳

秦二世元年廣陵人召平於是為陳王狗廣陵未能下

聞陳王敗走秦兵又且至乃渡江矯陳王命拜梁為楚



王上柱國 史記

漢孝景前三年正月甲子吳王濞初起兵於廣陵西涉淮因并楚兵發使遺諸侯書以七國反天子廼遣太尉條侯周亞夫將三十六將軍往擊吳楚吳王敗度淮走丹徒保東越漢使人給吳王出勞軍殺吳王 漢書

江都易王非以孝景前二年立為汝南王徙王江都治故吳國非好氣力治宮館招四方豪傑驕奢甚二十七年薨子建嗣建以謀反法誅有詔宗正廷尉即問建建自殺六年國除地入於漢為廣陵郡絕百二十一年平帝時王莽秉政立建弟盱眙侯子宮為廣陵王奉易王

後莽篡國絕 同上

武帝元狩六年立子胥為廣陵王祝詛事發覺有司按驗胥惶恐以綬自絞死賜諡曰厲立六十四年而誅國除 同上

漢安元年廣陵賊張嬰寇亂揚徐間積十餘年乃以張綱為廣陵太守綱單車徑詣嬰壘門嬰大驚走閉壘綱於門外罷遣吏兵留十餘人以書喻嬰請與相見嬰乃出降 通鑑綱目

漢安元年九月廣陵賊張嬰等寇郡縣是歲詣太守張綱降 後漢書



永嘉元年正月廣陵賊張嬰等復反攻殺堂邑江都長

同上

永嘉元年十一月丙午中郎將滕撫擊廣陵賊張嬰破

之同上

永平十年春二月廣陵王荆有罪自殺國除

同上

永初七年九月調零陵桂陽丹陽豫章會稽租米賑給

南陽廣陵下邳彭城山陽廬江九江饑民

同上

建安元年先主轉軍廣陵海西糜竺進妹於先主為夫

人三國志蜀書

魏黃初五年七月行東巡九月至廣陵

三國志魏書

黃初六年冬十月行幸廣陵故城

同上

吳黃武三年九月魏文帝出廣陵望大江曰彼有人焉

未可圖也乃還

三國志吳書

續志考正吳黃武三年即魏黃初五年也魏志于

五年僅云至廣陵六年則云臨江觀兵裴注文帝

有馬上詩則望大江之嘆宜在六年十月而吳志

顧云九月疑有舛誤一事引兩書亦殊煩贅

竿融者丹陽人初聚眾數百往依徐州牧陶謙謙使督

廣陵彭城下邳運漕曹公攻陶謙徐土騷動融將男女

萬口馬三千匹走廣陵廣陵太守趙昱待以賓禮融利



廣陵之眾因酒酣殺昱放兵大略因載而去同上

晉太安十年太保謝安出鎮廣陵通鑑綱目

太和四年大司馬桓温徙鎮廣陵同上

太元二年十月辛丑以謝平為兖州刺史廣陵相監江

北諸軍事晉書

太元四年正月謝安又出鎮廣陵同上

續志考正晉紀無太安年號當即係太元十年之

誤謝安為道子所構出鎮揚州即以太元十年卒

在揚州無兩次出鎮事二條舛誤重複

元興三年二月斬桓元所署青州刺史桓宏於廣陵晉書

宋桓元篡帝位高帝乃與弟道規沛郡劉毅東海何無

忌潛謀匡復桓修弟宏以征虜將軍領廣陵以道規為

宏中兵參軍劉毅先為宏佐吏遭母憂還京口至是往

江北與道規共集義徒高祖託以游獵會無忌及任城

魏詠之高平檀憑之及從弟藩等同謀二十七人并願

從者百餘人是時大雨暴起丙辰詰朝城門開義眾馳

入稱有詔齊聲大呼吏士驚散即獲桓修以狗又與桓

宏主簿平昌趙昶等率壯士六十人斬宏於廣陵城因

收眾濟江徐爰宋書

元嘉九年以江夏王義恭為南兖州刺史加都督鎮廣



陵南史

元嘉二十一年甲午以竟陵王誕為南兖州刺史

宋書

續志考正誕以元嘉二十年封廣陵王二十一年

為南兖州刺史時尚稱廣陵至二十六年封隨郡

王三十年改封竟陵王其先為南兖州刺史也僅

半年中歷衡陽王義季劉義賓徐湛之始興王濬

武陵王駿江夏王義恭南譙王義宣以及沈慶之

又歷劉延孫檀和之以及誕

元嘉三十年以沈慶之為領軍將軍南兖州刺史

通鑑綱目

宗越南陽葉人大明三年為長水校尉竟陵王誕據廣

陵反越領馬軍隸沈慶之攻誕及城陷孝武使悉殺城

內男丁越受旨乃誅躬臨其事莫不先加捶撻或有鞭

其面者欣欣然若有所得凡殺數千人

南史

竟陵王誕有勇略上頗相疑憚大明元年秋出為南兖

州刺史加都督誕知見猜亦潛為之備至廣陵因魏侵

邊修城隍聚糧練甲嫌隙既著道路常云誕反三年建

康人陳文詔訴父饒為誕府史恒使入山圖畫道路不

聽歸家誕大怒使人殺饒其年四月上使有司奏誕罪

惡乃貶爵為侯遣令之國上將謀誕以義興太守桓閻

為兖州刺史配以羽林禁兵遣給事中戴明寶隨閻襲



誕使聞以之鎮爲名聞至廣陵誕未悟也明寶夜報誕典籤蔣成使爲內應成以告府舍人許宗之宗之告誕誕斬蔣成勒兵自衛遣腹心率壯士擊明寶等破之聞卽遇害上遣車騎大將軍沈慶之討誕奉表投之城外自申於國無負并言帝宮闈之醜孝武忿誕深切凡誕左右腹心同籍期親並誅之死者千數車駕出頓宣武堂內外戒嚴誕見眾軍大集欲棄城北走十餘里眾並不欲去誕乃還城廣陵城舊不開南門云開南門者其主王誕乃開焉彭城邵領宗在城內陰結死士欲襲誕先欲布誠於慶之乃說誕求爲間搆見許領宗旣出致

誠畢復還城內事泄誕鞭二百考問不伏遂支解之七月二日慶之進軍尅其外城乘勝又尅小城誕聞軍入走趣後園墜水引出殺之傳首建鄴因葬廣陵貶姓留氏帝命城中無大小悉斬慶之執諫自五尺以下全之於是同黨悉伏誅城內女口爲軍賞男丁殺爲京觀死者尙數千人每風晨雨夜有號哭之聲誕母殷妻徐並自殺八年前廢帝卽位義陽王昶爲徐州刺史道經廣陵至墓盡哀表請改葬誕詔葬誕及妻子並以庶人禮明帝泰始四年又改葬祭以少牢

南史本傳

泰始四年七月以蕭道成爲南兖州刺史

通鑑綱目



南齊建武四年平西將軍崔慧景征壽陽軍頓白下時  
江夏王寶彜鎮京口遣余文興說之令北取廣陵收吳  
楚勁卒於時廣陵王長史蕭寅司馬崔恭祖守廣陵城  
慧景以寶彜事告恭祖恭祖先無宿契口雖相和心實  
不同還以事告寅共為閉城計寅心為恭祖與慧景同  
俄而慧景至恭祖閉門不敢出慧景知其異已泣數行  
而去中兵參軍張慶延明巖卿等勸慧景襲取廣陵密  
遣軍主劉靈運間行突入慧景俄至遂據其城南史  
永元初崔慧景授平安將軍征壽陽過廣陵數十里召  
會諸軍主曰吾荷三帝厚恩當顧托之重幼主昏狂朝

廷壞亂危而不扶責在今日欲與諸君共建大功以安  
宗社如何眾皆響應於是同軍還廣陵司馬崔恭祖守  
廣陵城開門納之南齊書

永元二年二月丁未平南將軍崔慧景於廣陵反舉兵  
內向王子命右衛將軍左興盛都督下水步眾軍禦之

南史中興元年齊東昏遣常僧景鎮廣陵李叔獻屯瓜步高  
祖遣使曉喻並率眾降乃遣從弟寧朔將軍景鎮廣陵

梁書

梁天監八年譙州刺史湛僧智圍魏東豫州刺史元慶



和於廣陵入其郛魏將元顯伯率軍赴援僧智逆擊破之夔自武陽會僧智斷魏軍歸路慶和於內築柵以自固及夔至遂請降夔讓僧智僧智曰慶和志欲降公不願降僧智今往必乖其意且僧智所將為合募人不可禦之以法公持軍素嚴必無犯令受降納附深得其宜於是夔乃登城拔魏幟建宮軍旗鼓眾莫敢妄動慶和束兵以出無私焉凡降男女口四萬餘人粟六十萬斛餘物稱是顯伯聞之夜遁眾軍追之生擒二萬餘人斬獲不可勝數詔以僧智領東豫州鎮廣陵同上

續志考正魏書地形志東豫州太和十九年置治

廣陵城隋志汝南郡之新息縣後魏置東豫州即

廣陵城所在非今揚州之廣陵作志者未及審考

夔附其兄夏侯亶傳引者仍史文遂脫其姓也

太清二年北齊徐州刺史封山侯正表謀襲廣陵平北

將軍南充州刺史蕭會理擊破之同上

東魏武定六年以辛術為淮南經略使及王僧辯破侯

景術招攜安撫城鎮相繼欵附前後二十餘州於是移

鎮廣陵獲傳國璽送鄴尋遷吏部尚書食南充州北史

續志考正北史原文食南充州梁郡幹按齊梁元

魏時幹力等輸絹以供祿秩幹若門僕之類一幹



輸絹十八匹南兖州梁郡其所兼食去幹字語意未完

大寶元年前江都令祖皓起義襲廣陵斬賊南兖州刺史董紹先侯景自帥水步軍擊皓二月癸未景攻陷廣陵皓等並見害

梁書

祖皓為江都令時侯景叛皓起兵廣陵斬景刺史董紹先推前太子中書舍人蕭勳為刺史又結魏人為援馳檄遠近將以討景景聞之大懼即日率侯子監等出自京口水陸並集皓嬰城拒守景攻城陷之景車裂皓以狗城中無少長皆斬之

冊府元龜

魏紀東魏

大寶三年七月廣陵僑民朱盛張象潛結兵襲齊刺史溫仲邕遣使來告高祖率眾濟江以應之會齊人來聘求割廣陵之地王僧辯許焉仍報高祖高祖於是引軍還南徐州

陳書

北齊天保四年陳霸先攻廣陵時梁將嚴超達等軍逼涇州尹令思謀襲盱眙三軍咸懼冀州刺史段韶謂諸將曰自梁氏喪亂國無定主人懷去就霸先外託同德內有離心吾揣之熟矣乃留儀同三司敬顯儁等圍宿豫自倍道赴涇州塗出盱眙令思不虞大軍卒至望旗而奔進破超達軍迴復廣陵霸先遁走

北史



陳永定二年五月癸丑齊廣陵南城主張顯和長史張僧那各率所部入附 陳書

大建五年九月景子左衛將軍樊毅克廣陵楚子城上 同

大建五年齊遣陸騫救齊昌出巴蘄遇陳將周炅炅留

羸弱設疑兵以當之身帥精銳由間道邀其後大破之

克巴州齊王琳保壽陽陳吳明徹以琳初入眾心未固

乘夜攻之城潰山陽盱眙降陳陳復克齊青州馬頭廣

陵等城 通鑑綱目

續志考正內引克廣陵即前條樊毅所克者祇屬

一事餘皆與揚不涉

大建八年正月甲申廣陵金城降 陳書

大建十三年隋主有并吞江南之志問將於高穎穎薦

弼與擒虎故以弼鎮廣陵擒虎守廬江使潛為經略 通鑑

綱目

至德二年十一月隋遣晉王廣眾軍來伐自巴蜀沔漢

下流至廣陵數十道俱入 陳書

至德三年春正月乙丑朔霧氣四塞是日隋總管賀若

弼自北道廣陵濟京口 同上

續志考正係禎明俱誤作至德

北周大象元年九月遣邲國公梁士彥伐陳十一月士



彥拔廣陵 周書

大象九年以韋叔裕為行軍元帥徇地淮南乃分遣郟國公梁士彥攻廣陵拔之 北史

續志考正大象只有二年韋叔裕為行軍元帥梁士彥其分遣者周書北史實共一事以兩引失之

隋開皇初以秦王俊為揚州總管四十四州諸軍事鎮廣陵 同上

開皇六年晉王為揚州總管鎮江都 隋書

續志考正秦王鎮江都在六年晉王已在平陳後係開皇十年事

開皇九年正月朔陳主會朝大霧四塞陳主昏睡至晡時乃寤是日賀若弼自廣陵引兵濟江 通鑑綱目

續志考正即前禎明三年霧氣四塞云云一事兩

引

齊王暕仁壽中拜揚州總管江淮以南諸軍事 北史

大業元年三月辛亥發江南郡男女百餘萬開通濟渠

自板渚引河通於淮 隋書

續志考正隋紀發河南諸郡男女七百萬開通濟

渠自西苑引穀洛達于河自板渚引河通于海刪

去自穀洛達于河句以其不繫揚也改河南諸郡



爲江南郡非復本文也

大業元年八月壬寅帝御龍舟幸江都以左武侯大將軍郭衍爲前軍李景爲後軍文武官五品以上給樓船九品以上給黃蔑舟舳舻相接二百餘里

冊府元龜

大業六年三月帝如江都

通鑑綱目

大業十一年詔江都更造龍舟煬帝以楊彜感之亂龍舟皆焚詔江都更造數千艘制度仍大於舊者

同上

大業十二年江都龍舟成送東都宇文述勸幸江都帝從之將軍趙才諫曰今百姓疲勞府藏空竭盜賊蜂起禁令不行願陛下還京師安兆庶帝大怒以屬吏旬日

出之朝臣皆不欲行無敢諫者建節尉任宗上書極諫即日於朝堂杖殺之遂幸江都命越王侗與光祿大夫段達太府卿元文都民部尚書韋津右武衛將軍皇甫無逸右司郎盧楚等總留後事帝以詩留別宮人曰我夢江都好征遼亦偶然奉信郎崔民象以盜賊充斥於建國門上表諫帝大怒先解其頤然後斬之虞世基以盜賊充斥請發兵屯洛口倉帝曰卿是書生定猶懼怯敕移箕山公路二府於倉內仍令築城以備不虞至汜水奉信郎王愛仁復上表請還西京斬之至梁郡郡人邀帝上書曰陛下若遂幸江都天下非陛下之有又斬



之同上

大業十二年帝至江都江淮郡官謁見者專問禮餉豐薄豐則超遷薄則停解江都郡丞王世充獻銅鏡屏風遷通守歷陽郡丞趙元楷獻異味遷江都郡丞由是郡縣競務刻剝以充貢獻民外爲盜賊所掠內爲郡縣所賦生計無遺加之饑饉民始采樹皮葉或擣藁煮土而食之諸物皆盡乃自相食而官倉猶充牣吏皆畏法莫敢賑救王世充密爲帝簡閱江淮民間美女獻之由是益有寵

同上

大業十三年煬帝幸江都時李密據洛口帝懼留淮左

化及反授裴虔通兵以換諸門衛士虔通因自開門領數百騎至成象殿殺將軍獨孤盛武賁郎將元禮遂引兵進宿衛者皆走虔通進兵排左閣馳入永巷問陛下安在有美人出方指云在西閣從往執帝化及入朝堂爲丞相令將帝出江都門復入遣令狐行達弒帝於宮中

隋書

大業十三年宇文化及殺煬帝以右禦衛將軍陳稜爲江都太守已而稜降高祖授以總管卽守其郡子通攻稜稜窮乞師於沈法興杜伏威伏威自將屯清流法興遣子綸屯楊子間十里子通納言毛文深請募吳人詐



為法興兵夜襲伏威二人遂交惡無敢先戰者子通得悉力取江東遂據之稜奔而免子通潛即皇帝位國號吳建元明政伏威命輔公祐拔丹陽進屯溧水子通戰敗糧且盡棄江都保京口伏威盡得其地

唐書

皇泰二年李子通據海陵有窺江表之心攻江都克之即帝位國號吳

通鑑綱目

續志考正皇泰只一年無二年

唐嗣聖元年徐敬業貶柳州司馬會給事中唐之奇貶括蒼令詹事府司直杜求仁貶黜令長安主簿駱賓王貶臨海丞敬猷自墊屋令坐事免俱客揚州失職怏怏

時武后既廢中宗又立睿宗實亦囚之諸武擅命唐子孫誅戮天下憤之敬業等乘人怨謀起兵先諭其黨監察御史薛璋求使江都及至令雍人韋超告州長史陳敬之反璋乃收繫之敬業即矯制殺敬之自稱州司馬且言奉密詔募兵討高州叛酋即開府令參軍李宗臣釋繫囚役工數百人授甲斬錄事參軍孫處行以狗乃開三府一曰匡復府二曰英公府三曰揚州大都督府自稱匡復府上將領揚州大都督

同上

光宅元年九月丁丑柳州司馬徐敬業舉兵於揚州以討亂

同上



武后初徐敬業起兵於揚州武太后令將軍李孝逸討之敬業拒於高郵之下阿谿置陣既久士卒多疲怠孝逸因風縱火敬業懼燒而退孝逸進擊大破之

舊唐書

裴炎與徐敬業等合謀揚州兵起炎從內應與敬業等合謀惟有青鸞字人有告者朝臣莫之能解則天曰此青字者十二月鸞字者我自與也遂誅炎敬業等尋敗

朝野僉載

上元元年劉展爲淮西節度監軍邢延恩奏展偏彊不受命請除展爲江淮都統代李峘俟其釋兵赴鎮中道執之上從之以展爲江淮都統密敕李峘及淮東節度

使鄧景山圖之延恩以制書授展展疑之曰江淮租賦所出今之重任展無勳勞一旦恩命如此疑有讒人間之事苟不欺印節可先得乎延恩懼乃馳詣廣陵解峘印節以授展展乃上表謝恩牒追江淮親舊置之心膺悉與宋州兵七千趣廣陵延恩奔還廣陵與李峘鄧景山發兵拒之移檄州縣言展反展亦移檄言峘反州縣莫知所從峘引兵渡江屯京口鄧景山將萬人屯徐城展素有威名江淮人望風畏之使其將孫待封擊景山景山眾潰展遂入廣陵

通鑑綱目

上元元年十一月甲午揚州長史劉展反

唐書



上元二年田神功使楊惠元范知新等分道擊劉展知  
新至下蜀展拒擊之將軍賈隱林射展中目遂斬之惠  
元破王暉於淮南孫待封詣李藏用降餘黨皆平平盧  
軍大掠十餘日安史之亂兵不至江淮至是其民始罹

荼毒矣

通鑑綱目

至德元載置淮南節度使領楊楚等十三州治揚州唐書  
至德元載十二月永王璘反引舟師東下甲士五千令  
季廣琛趨廣陵攻採訪使李成式明年肅宗遣宦者啖  
廷瑤等與成式謀招諭之時河南招討判官李銑在廣  
陵有兵千餘廷瑤邀銑屯楊子成式又遣裴戎以廣陵

卒三千戍伊婁埭張旗幟大閱士璘與楊璘子登陴望之

有懼色廣琛知事不集謂諸將曰與公等從王豈欲反

邪上皇播遷道路不通而諸子無賢於王者將總江淮

銳兵長驅雍洛大功可成今乃不然使吾等名絙反逆

如後世何眾許諾遂割臂盟於是惟明姓奔江甯馮季

康奔白沙廣琛以兵六千趨廣陵同上

德宗以大曆十四年即位六月己未詔曰揚州每歲以

端午之日鑄貢鏡於江中者及幽州歲貢麝香皆罷之

冊府元龜

德宗大曆十四年七月令王公百官及天下長吏無得



與人爭利先於揚州置邸肆貨易者皆罷之先是諸道節度觀察使以廣陵當南北之衝百貨之集多以軍儲貨販例置邸肆名託軍用實私其利焉至是乃絕同上

廣明元年黃巢北踰五嶺犯湖湘江浙進逼廣陵高駢閉門自固所過鎮戍望風降賊舊唐書

僖宗乾符六年十月制以鎮海軍節度浙江西道觀察處置等使高駢簡較司徒同平章事揚州大都督府長史充淮南節度副大使知節度事江淮鹽鐵轉運江西行營招討等使進封燕國公初駢在浙西遣大將張麟梁纘等大破黃巢於浙東賊進寇福建踰嶺表故移鎮

揚州時賊北踰大庾嶺朝廷授駢諸道行營兵馬都統

冊府元龜

中和元年五月高駢移檄討賊有雙雉集廣陵府舍占者以為城邑將空之兆駢惡之乃移檄四方云將入討黃巢發兵八萬舟二千艘出屯東塘諸將數請行期駢託風濤為阻竟不發通鑑綱目

高駢末年惑於神仙之說呂用之張守一諸葛殷等皆言能役使鬼神變化黃白駢酷信之遂委以政事用之等援引朋黨恣為不法其後亦慮多言者有所洩漏因謂駢曰高真上聖要降非難所患者學道之人真氣稍



虧靈貺遂絕駢聞之以爲信然乃謝絕人事屏棄妾媵  
賓客將吏無復得見者有不得已之故則遣人沐浴齋  
戒詣紫極宮道士祓除不祥謂之解穢然後見之拜起  
纔終已復引出自此內外壅隔紀綱日紊用之等因大  
行威福傍若無人歲月既深根蒂遂固用之自謂磻溪  
真君張守一謂是赤松子諸葛殷稱將軍有一蕭勝者  
謂之秦穆公附馬皆云上仙遣來爲令公道侶其鄙誕  
不經率皆如此江陽縣前一地祇小廟用之貧賤時常  
與妻寓止巫舍凡所動靜必禱而後行及得志謂爲冥  
助遂修崇之迴廊曲室妝樓寢殿百有餘間土木工飾

盡江南之選每軍旅大事則以少牢祀之守一皆云神  
遇駢凡有密請卽遣二人致意焉中和元年用之以神  
仙好樓居請于公廨邸北跨河爲迎仙樓其斤斧之聲  
晝夜不絕費至數萬緡歲餘方就自立至敗竟不一游  
肩鏑儼然以至灰燼是冬又起延和閣於大廳之西凡  
七間高八丈皆飾以金玉綺窗牖戶殆非人工每旦焚  
名香列異寶以祈王母之降及師鐸亂人有登之者于  
藻井垂蓮之上見二十八字云延和高閣上千雲小語  
猶疑太乙聞燒盡降真無一事開門迎得畢將軍此近  
詩妖也用之公然云與上仙來往每對駢或叱咄風雲



顧揖空中謂見羣仙來往過於外駢隨而拜之用之指畫紛紜略無媿色左右稍有異論則死不旋踵矣見者莫測其由但搏膺不敢出口用之忽云后土夫人靈仇遣使就某借兵馬并李筌所撰太白陰經駢遽下兩縣萃百姓葦席數千領畫作甲馬之狀遣用之於廟庭燒之又以五綵牋寫太白陰經十道置於神座之側又於夫人帳中塑一綠衣少年謂之韋郎廟成有人於西廡棟上題一長句詩曰四海干戈尙未寧謾勞淮海寫儀形九天元女猶無信后土夫人豈有靈一帶好雲侵鬢綠兩行岩岫拂眉青韋郎年少耽閒事案上休看太白

經好事者競相傳誦是歲詔於廣陵立駢生祠并石刻頌差州人採碑材於宣城及至楊子縣用之一夜遣人密以健牯五十牽至州南鑿垣架濠移入城內及明柵緝如故因令楊子縣申府昨夜碑石不知所在遂懸購之至晚云被神人移置街市駢大驚乃於其傍立一大木柱上金書云不因人力自然而至卽令兩都出兵仗鼓樂迎入碧筠亭至三橋擁鬧之處故埋石以礙之僞云人牛拽不動駢乃朱篆數字貼於碑上須臾去石乃行觀者互相謂曰碑動也識者聞而惡之明日有楊子一村嫗詣知府判官陳牒云夜來里胥借耕牛牽碑悞



損其足遠近聞之莫不絕倒比至失守師鐸之眾竟自壞墉而進駢嘗與丞相鄭公不叶用之知之忽曰適得上仙書宰執之間有陰圖令公者使一俠士來夜當至駢驚悸不已問計於用之用之曰張先生少年時嘗學斯術於深井里聶夫人近日不知更肯爲之否若有但請此人當之無不齏粉者駢乃立召守一語之對曰老夫久不爲此戲手足生疎然爲令公有何不可及期衣婦人衣匿於別室守一寢於駢臥內至夜分擲一鐵銅於階砌之上鏗然有聲遂出皮囊中毓血灑於庭戶檐宇間如格鬪之狀明日駢泣謝守一曰蒙仙公再生之

恩真枯骨重肉矣乃躬輦金玉及通天犀帶以酬其勞焉又有蕭勝者亦用之之黨也納五百金賂於用之用之曰爾何欲勝曰欲得知鹽城監耳用之見駢爲求知鹽城監駢以當任者有績予奪之間頗有難色用之曰用勝爲鹽城者不爲勝也昨得上仙書云有一寶劍在鹽城井中須一靈官取之以勝爲上仙左右人故欲遣去耳駢俛仰許之勝至鹽城監數月遂匣一銅匕首獻於駢用之稽首曰此北帝所佩者也得之則百里之內五兵不敢犯駢甚異之遂飾以寶玉常置於座隅時廣陵久雨用之謂駢曰此地當有火災郭邑之間悉合灰



燼近日遣金山下毒龍以少雨濡之自此雖無大段燒熟亦未免小小驚動也於是用之每夜密遣人縱火凡荒祠壞宇無復存者駢嘗授道家秘法用之守一無增焉因刻一青石如手板狀隱起龍蛇近成文字玉皇授白雲先生高駢潛使左右置安道院香几上駢見之不勝驚喜用之曰玉皇以令公焚修功著故特有是命計其鸞鶴不久當降某等此際謫限已滿便應得陪幢節同歸真境也他日瑤池席上亦是人間一故事言畢歡笑不已遂相與登延和閣命酒肴極歡而罷後於道院庭中刻木爲鶴大如小駟羈轡中機楨人或逼之奮然

飛動駢嘗羽服跨之仰視空闊有飄然之思矣自是嚴齋醮鍊金丹費耗資財動逾萬計日居月諸竟無其驗

廣陵妖亂志

呂用之鄱陽安仁里細民也性桀黠略知文字父璜以貨茗爲業來往於淮浙間時四方無事廣陵爲歌鐘之地富商大賈動逾百數璜明敏善酒律多與羣商游用之年十二三其父挈行旣慧悟事諸賈皆得其歡心時整履搖箠匿其家與奴婢等居數歲璜卒於家乾符初羣盜攻剽州里遂他適用之旣孤且貧其舅徐魯仁賙急之歲餘通於魯仁室爲魯仁所逐因事九華山道士



牛宏徽宏徽自謂得道者也用之降志師之傳其驅役  
考召之術宏徽既死用之乃復客於廣陵遂穀巾布褐  
用符藥以易衣食歲餘丞相劉公節制淮左有蠱道冥  
法者逮捕甚急用之懼遂南渡時高駢鎮京口召致方  
技之士求輕舉不死之道用之以其術通於客次逾月  
不召詣渤海親人俞公楚奇之遂爲儒服目之曰江西  
呂巡官因間薦之於渤海及召試公楚與左右附會其  
術得驗尋署觀察推官仍爲制其名因字之曰無可言  
無可無不可也自是出入無禁初專方藥香火之事明  
年渤海移鎮用之因固請戎服遂署右職用之素負販

久客廣陵公私利病無不詳熟鼎竈之服妄陳時政得  
失渤海益奇之漸加委仗先是渤海舊將有梁纘陳拱  
馮綬董僅公楚歸禮日以疎退渤海至是孤立矣用之  
乃樹置私黨窺向動息有不可去者則厚以金寶悅之  
左右羣小皆市井人見利忘義上下相蒙大逞妖妄仙  
書神符無日無之更迭唱和罔知愧恥自是賄賂公行  
條章日紊煩刑重賦率意而爲道路怨嗟各懷亂計用  
之懼有竊發之變因請置巡察使採聽府城密事渤海  
遂承制授御史大夫充諸軍都巡察使於是召募府縣  
先負罪停廢胥吏之陰狡凶狠者得百許人厚其官傭



以備指使各有十餘丁縱橫閭巷之間謂之察子至於士庶之家呵妻怒子密言隱語莫不知之自是道路以目有異已者縱謹靜端默亦不免其禍破滅者數百家將校之中累足屏氣焉

同上

高駢嬖吏諸葛殷妖人呂用之之黨也初自鄱陽將詣廣陵用之先謂駢曰玉皇以令公久爲人臣機務稍曠獲譴於時君輒遣左右一尊神爲令公道中羽翼不久當降令公善遇之欲其不去亦可以人間優職縻之明日殷果來遂巾褐見駢於碧筠亭妖形鬼態辨詐蜂起謂可以坐召神仙立變寒暑駢莫測也俾神靈遇之謂

之諸葛將軍也每從容酒席間聽其鬼怪之說則盡日忘倦自是累遷鹽鐵劇職聚財至數十萬緡其兇邪陰狡視用之蔑如也有大賈周師儒者其居處花木樓榭之奇爲廣陵甲第殷欲之而師儒拒焉一日殷謂駢曰府城之內當有妖起使其得志非水旱兵戈之匹也駢曰爲之奈何殷曰當就其下建齋壇請靈官鎮之殷卽詣師儒之第爲處駢命軍候驅出其家是日雨雪驟降泥淖方盛執事者鞭撻迫蹙師儒攜挈老幼匍匐道路觀者莫不愕然殷遷其族而家焉殷足先患風疽至是而甚每一躁癢命一青衣交手爬搔血流方止駢性嚴



潔甥姪輩皆不得侍坐唯與殷款曲未嘗不廢寢忘餐或促膝密坐同盃共器遇其風疽忽發卽恣意搔捫指爪之間膿血沾染駢與之飲啗曾無難色左右或以爲言駢曰神仙多以此試人汝輩莫介意也駢前有一犬子每聞殷腥穢之氣則來近之駢怪其馴狎殷笑曰某嘗在大羅宮玉皇前見之別來數百年猶復相識其虛誕率多如此高虞常謂人曰爭知不是我滅族冤家也殷性躁虐知揚州院來兩月官數百人鞭背殆半光啟二年僞朝授殷兼御史中丞加金紫及城陷竄至灣頭爲邏者所擒腰下獲黃金數斤通天犀帶兩條旣縛入

城百姓聚觀交唾其面尋撮其髻髮頃刻都盡獄具刑於下馬橋南杖至百餘絞而未絕會師鐸母自子城歸家經過法所遂扶起避之復蘇於橋下執朴者尋以巨木踣之騶殿過決法如初始殷之遇也驕暴之名尋布於遠近其族人輒以謙損戒殷殷曰男子患於不得遂志耳旣得之當須富貴自處人生寧有兩遍死者至是果再行法及棄屍道左爲仇人剗其目斷其舌兒童輩爭以瓦礫投之須臾成峰

同上

吳堯卿者家於廣陵初傭保於逆旅善書記因出入府庭遂聞於縉紳始爲鹽鐵小吏性敏辨事之利病皆心



計口誦悅人耳目故丞相李蔚以其能首任之高駢因署堯卿知泗州院兼判國監尋奏爲刺史制命未行會軍變復歸廣陵頃之知浙西院數月而罷又知揚州院兼權糴使僞朝授堯卿御史大夫堯卿託附權勢不問貴賤苟有岐路縱所養輩必歛衽以金玉餌之微似失勢雖素約爲死交則相對終日不復與言趨利背義如此權貴無不以賄賂交結之故不離淮泗僭竊朱紫塵污官省三數年間盜用鹽鐵錢六十萬緡時王棨知兩使務局下堯卿獄將窮其事爲諸葛殷所保持護全及城陷軍人識是堯卿者咸請陷之畢師鐸不許夜令堯

卿以他服而遁至楚州遇變爲仇人所殺棄屍衢中其妻以紙絮葦棺歛之未及就壙好事者題其上云信物一角附至阿鼻地獄請去斜封送上閻羅大王時人以爲笑端

同上

光啟三年畢師鐸秦彥攻高駢呂用之以駢命署行密行軍司馬督其兵進援客袁襲說行密曰高公耄昏妖人用權彥乃以逆除暴愈熾其亂公亟應必得其地行密乃檄部州裒兵而東次天長而揚州陷行密薄城而屯用之以兵屬之彥以奇兵背城戰行密臥帳中令曰賊近報我俄而陷一屯別將李宗禮入曰兵士百戰且



不利請堅壁徐引歸可也李濤怒日以順去逆何眾寡  
爲今尙何歸願以所部前死行密喜益甲出戰俘殺如  
藉彥軍不出會駢死襲勸行密舉軍縞素大臨三日進  
城未能下用之將張審威詭伏西壕殺闖者合外兵彥  
軍疲守邏皆潰去行密入據揚州

唐書

光啟三年夏四月淮南都將畢師鐸等發兵討呂用之  
克揚州用之亡走師鐸執高駢而幽之

通鑑綱目

光啟三年四月甲子淮南兵馬使畢師鐸陷揚州執其  
節度使高駢五月甲戌宣歙觀察使秦彥入於揚州九  
月秦彥殺高駢十月秦宗權將孫儒寇揚州十一月壬

申廬州刺史楊行密陷揚州

唐書

光啟三年十月楊行密克揚州廣陵城中無食草根木  
實皆盡以堇泥爲餅食之餓死者大半宣軍掠人詣肆  
賣之驅縛屠割流血滿市部將張審威帥麾下登城啟  
關納外兵守皆不鬪而潰先是彥師鐸信重妖尼奉仙  
至是問計奉仙曰走爲上策乃奔東塘行密入城改殯  
駢及其族城中遺民纔數百家饑羸非復人狀行密輦  
西塞米賑之自稱淮南留後

通鑑綱目

光啟三年十一月秦宗權遣其弟宗衡將兵萬人度淮  
與楊行密爭揚州以孫儒爲副張佶劉建鋒馬殷宗權



族弟彥暉皆從抵廣陵城西據行密故寨秦彥畢師鐸引兵與合未幾宗權召宗衡等還蔡拒朱全忠孫儒知宗權勢不能久稱疾不行宗衡屢促之儒怒殺之傳首於全忠分兵掠鄰州眾至數萬以城下乏食還襲高郵張神劍逃歸揚州儒屠高郵行密殺神劍而阮其眾又恐孫儒乘勝取海陵命鎮遏使高霸帥其兵民悉歸府城凡數萬戶

同上

孫儒秦宗權都將宗權使弟宗衡爭淮南儒斬宗衡并其眾文德元年破揚州自爲淮南節度使

唐書

文德元年二月以楊行密爲淮南留後張廷範至廣陵

楊行密厚禮之及聞李璠來怒有不受之色廷範密使人白全忠宜自以大軍赴鎮全忠從之至宋州廷範逃歸曰行密未可圖也乃奏以爲留後

同上

文德元年四月戊辰孫儒陷揚州自稱淮南節度使行

密奔於廬州

唐書

大順元年秋七月東平王全忠約與我共攻孫儒儒恃兵強移檄藩鎮數行密及全忠罪且曰俟平宣汴當引兵除君側之惡於是悉焚揚州廬舍驅丁壯婦女渡江殺老疾以餉軍行密別將張訓李德誠潛入揚州滅餘火得穀數十萬斛以賑饑民

十國春秋



大順二年七月孫儒焚揚州以逃

唐書

景福元年六月戊寅楊行密陷揚州

同上

天祐二年十一月吳王楊行密卒子渥代為淮南節度

使通鑑綱目

天祐十二年吳徐溫出鎮潤州留子知訓江都輔政

同上

吳徐溫以金陵形勝戰艦所聚乃自以淮南行軍副使

領昇州刺史留廣陵以其假子元從指揮使知誥為昇

州防遏兼樓船副使往治之

同上

梁太祖破朱瑾奔於淮南楊行密聞瑾來大喜解其

玉帶贈之表瑾領武寧軍節度使以為行軍副使其後

累表瑾東南諸道行營副都統領平盧軍節度使同中

書門下平章事行密死渥及隆演相繼立皆年少徐溫

與其子知訓專政畏瑾欲除之瑾乃謀殺知訓嘗以月

旦遣愛妾候知訓家知訓強通之妾歸自訴瑾益不平

屢勸隆演誅徐氏以去國患隆演不能為既而知訓以

泗州建靜淮軍出瑾為節度使將行召之夜飲明日知

訓過瑾謝延之升堂出其妻陶氏知訓方拜瑾以笏擊

踏之伏兵自戶突出殺之初瑾以二惡馬繫庭中知訓

入而釋馬使相踉鳴故外人莫聞其變瑾攜其首馳示

隆演曰今日為吳除患矣隆演曰此事非吾敢知遽起



入內瑾忿然以首擊柱提劍而出府門已闔因踰垣折其足瑾顧路窮大呼曰吾爲萬人去害而已一身死之遂自刎潤州徐知誥聞亂以兵趨廣陵族瑾家瑾妻陶氏臨刑而泣其妾曰何爲泣乎今行見公矣陶氏欣然就戮聞者哀之瑾名重江淮人畏之其死也尸之廣陵北門路人私共瘞之是時人多病瘧皆取其墓上土以水服之云病輒愈更益新土漸成高墳徐溫等惡之發其尸投於雷公塘後溫病夢瑾挽弓射之溫懼網其骨葬塘側立祠其上

五代史

徐知訓爲朱瑾所殺知誥居潤州近廣陵得先聞卽日

以州兵渡江定亂遂爲淮南節度副使宋齊邱曰潤州之命實天贊也初徐氏諸子不齒知誥而知訓尤悖嘗召知誥飲酒伏劍士欲害之行酒吏刁彥能酒至知誥以手爪指之知誥悟起走乃免後知誥自潤州入瑾知訓與飲於山光寺又欲害之徐知諫以謀告知誥知誥起遁去知訓以劍授刁彥能使追殺之及於中途而還給以不及由是得免

南唐書

昇元四年十月乙巳詔幸東都命齊王璟監國庚戌帝自保德門御舟辛亥次迎鑾鎮甲寅至東都入建元門帝感念疇昔泣然流涕不已遣使問東畿士民不能自



存者已未高麗使廣評侍郎柳兢質來貢方物十一月  
乙丑宴羣臣於崇德宮故第也乙酉賜東畿高年疾苦  
惇獨米人二石 陸游南唐書

保大元年七月以元子南昌王冀為江都尹東都留守

馬令南唐書

保大二年春二月乙酉周師陷東都執副留守馮延巳

十國春秋

保大十五年二月乙亥周主復帥兵南侵元宗知東都

必不守遣使悉焚官私廬舍徙其民於江南周師遂入

揚州 同上

保大十六年三月丁卯周人次揚州丁亥復次揚州 馬令南唐書

南唐書

顯德三年正月甲寅李重進為淮南道行營都招討使

二月丙戌取揚州 五代史周本紀

顯德三年正月帝親征淮南甲寅次正陽命侍衛馬步

軍都指揮使李重進為淮南道行營都招討使仍以龍

衣金帶玉鞍名馬等賜之 冊府元龜

顯德三年世宗親征淮南四月丁亥車駕發自濠州迴

幸渦口是時銳於攻取意欲親幸揚州宰臣范質等以

師老泣諫乃止 同上



顯德三年世宗詔知揚州無備命韓令坤等將兵襲之  
戒以毋得殘民其李氏陵寢遣人與其人共守護之

綱目

顯德四年十二月江南李景遣兵驅虜揚州士庶渡江  
焚其州郭而去 冊府元龜

周世宗征淮南聞揚州無備遣韓令坤及宣祖白延遇  
趙晁等襲之令坤先令延遇以精騎數百遲明馳入城  
中不之知覺令坤繼至撫之民皆按堵南唐東都副留  
守馮延魯為僧匿寺中令坤求獲之送行在遂以令坤  
知州事南唐遣將陸孟俊進軍蜀岡逼揚州令坤棄其

城世宗怒命太祖與張永德領兵趨六合援之令坤聞  
援至復入城守與孟俊兵戰大敗之俄歸朝世宗復幸  
淮右次楚州遣令坤率兵先入揚州命權知軍府事揚  
州城為吳人所毀詔發丁壯別築新城命令坤為修城  
都部署 宋史

周世宗征淮南取揚州留李重進戍守加淮南道節度  
使太祖即位以韓令坤代重進與太祖俱事周室分掌  
兵柄常心憚太祖太祖立愈不自安及聞移鎮陰懷異  
志太祖知之遣六宅使陳思誨齎賜鐵券以安其心重  
進欲治裝隨思誨入朝為左右所惑猶豫不決又自以



周室近親恐不得全遂拘思誨治城隍繕兵甲遣人求  
 援李景景懼而不納聞之太祖監軍安友規常為重進  
 所忌至是友規謀與親信數人斬關出為眾所拒踰城  
 得脫重進捕軍校不附者數十人盡殺之太祖遣石守  
 信王審琦李處耘宋廷渥四將率禁兵討重進守信遣  
 使馳奏揚州破在旦夕願車駕臨視太祖徑至城下即  
 日拔之初城將陷重進左右勸殺思誨重進曰吾今舉  
 族將赴火死殺此何益即縱火自焚思誨亦為其黨所  
 害太祖入駐城西南閱黨數百人盡戮之同上  
 宋建隆元年九月淮南節度使李重進叛命王審琦李

處耘宋廷渥率師討之削奪李重進官爵冬十月丁亥  
 詔親征皇弟為大內都點檢吳廷祚為東京留守庚寅  
 發京師丁未次揚州即日拔其城李重進伏誅揚州平

東都  
事略

李重進反揚州以石守信為行營都部署兼知揚州行  
 府事帝親征至大儀鎮守信馳奏城破在朝夕大駕親  
 臨一鼓可平帝亟赴之果克其城宋史

靖康元年正月道君皇帝南幸童貫以勝捷兵三千扈  
 從渡淮如維揚高球以禁衛三千留泗上控扼淮津既  
 抵維揚父老邀車駕不可渡江而道君決意南幸遂如



鎮江道君太上皇后居揚州皇子帝姬皆流寓沿路州縣聞賊退多先歸 靖康要錄

靖康二年四月二十五日甲申龍圖閣直學士知揚州許份等伏請大元帥即位於揚州 三朝北盟會編

建炎元年九月甲午命揚州守臣呂頤浩繕修城池壬寅遣徽猷閣待制孟忠厚迎奉太廟神主赴揚州十月

丁巳朔帝登舟幸淮 司戊午 太后至揚州癸未至揚州禁內侍統兵官相見 宋史

建炎二年春正月高宗幸揚州金人陷徐州守臣王復罵賊不屈粘罕聞韓世忠守淮揚乃分兵萬人趨揚州

自以大兵迎世忠不能敵遂陷揚州 靖炎兩朝聞見錄

建炎三年二月三日上得鄭詢報不移刻出揚州都統王淵內侍康履等數騎從過市市人指之曰官家去也

俄有宮人自大內星散而出城中大亂宰相潛善伯彥自都堂鞭馬而去軍民爭諸門而出死者不可計數上

行次楊子橋見一親事官發言不遜上掣手劍殺之 三朝北盟會編

建炎三年二月金人入揚州百姓謂上渡江萬人爭門而去見金人游騎到乃誼呼言我揚州有主矣遂家家

備香花投拜金人入城問上所在眾曰渡江矣乃馳瓜



洲望江而復回官軍吏民死者數十萬

同上

建炎三年粘罕犯揚州是時邊報屢至市井皆知金人兵將至者而宰相黃潛善汪伯彥禁止街市不得煽搖邊事亦不許士庶搬挈出城二月晦夜閻瑾解到金人生口朝廷倉皇以內帑所有通夕搬挈翌旦駕舟泊河岸居人驚怖莫知所爲上卽欲南幸潛善等勸且候探得實渡江未晚也是日遣兵出西門禦賊士氣不銳人無鬪志在職百官皆奔竄是夜江都縣前火

同上

建炎己酉高宗在維揚正月十三日夜得泗州報事出倉卒自風聞而遁維揚居民挈妻孥而走者十室而八

爭門以出相踐蹂而死者不可勝計二月初三日巳刻得天長軍關報始知金人已到上聞乃介被胄走馬出門惟五六內侍及護聖軍數人隨駕更無扈從上天性慈仁亦不呵止百姓第與行人竝輿而行觀者無不駭嘆至申刻金人已到揚子橋應供官私搬載什物舳舻相啣無慮萬計悉爲所有是夜揚州火發凡三四日人民未渡江者尙數十萬奔迸墜江而死者不啻大半婦人無貴賤老幼悉被驅虜不從者殺之所不忍見金銀珍珠玉帛委棄江畔可掬而取小民或就江網得金銀者不以多少但足爲渡江之費或渡人得三百星者舟



子為富焉 維揚巡幸記

建炎維揚南渡時雖甚倉猝二府猶張蓋搭狨坐而出  
軍民有懷輒徂擊黃相者 老學庵筆記

建炎三年金人陷揚州王德從劉光世軍之鎮江金人  
據楚泗德與戰於高郵邵伯之間 三朝北盟會編

紹興元年金人攻揚州圍鎮撫使郭仲威薛慶往救之  
殺金人兵甚眾 三朝北盟會編

紹興三十一年金主亮南侵以劉錡為江淮浙西制置  
使八月引兵屯揚州建大將旗鼓軍容甚肅觀者歎息  
以兵駐清河口金人以氊裹船載糧而來錡使善沒者

鑿沉其舟錡自楚州退軍邵伯鎮金人攻真州錡引兵  
還揚州帥劉澤以城不可守請退兵瓜州金萬戶高景  
山攻揚州錡遣員琦拒於皂角林陷圍力戰林中伏發  
大敗之 宋史

紹興三十一年十一月金人至揚州東門外漢王廟建  
御寨詣瓜州岸望大江見本朝以戰艦水教江心旌旗  
麗日器甲鮮明蒙衝艦海鯨戈船獅子船樓子船於大  
江心飛布長陣望北岸一弩箭射不到處打梆子聲絕  
排一字陣於浮玉亭上聲喏諸船復回敵眾大駭亮謂  
臣下曰此紙糊船何足道哉遂回揚州 楊王江上錄



紹興三十一年十月十九日戊午劉錡退軍至邵伯鎮已聞金人犯眞州謂揚州無官吏矣遲疑未敢發會探者回報見揚州城上旗幟猶是官軍錡曰雖失眞州而揚州猶爲國家守當速進乃自北門入見安撫劉澤澤以城不可守謂當退軍瓜洲錡令諸軍憩歇徐圖所向

三朝北盟會編

紹興三十一年十月二十三日金人自山路徑犯揚州屯於平山堂邵宏淵在楊子橋南毀板而渡揚州居民皆傾城而奔壬戌劉錡乃退軍自南門外拆民屋爲浮橋諸軍過絕卽毀浮橋由河東而去同上

紹興三十一年十月二十六日乙丑金人占揚州癸亥追逐劉錡有與官軍相遇者官軍拒退之乙丑金人大軍來爭瓜洲渡左軍統領員琦相拒於皂角林敗之同上紹興三十一年十一月十九日金人陷眞州直趨揚州劉錡中軍統制邵宏淵將遊擊兵數千遇楊子橋與之夾水陣雨矢交下晝夜相持三日故賊不得東時錡全軍在山陽與賊對壘而揚州無守備微宏淵則陷於賊錡腹背受敵進退失據矣二十一日錡棄楚州陷之還屯揚州二十二日賊攻揚州陷之錡敗績退保瓜洲渡二十六日虜高萬戶率騎八千來犯瓜洲錡時病嘔血



遂肩輿力疾督戰於皂角林前鋒將員琦先登陷圍下馬死鬪二十餘合破之賊益生兵張左右翼掩襲軍後錡遣中軍游奕統制邵宏淵并力禦之血戰自卯至申賊敗引去橫屍二十餘里

中興禦侮錄

開禧元年韓侂胄用事八月以殿帥郭倪爲鎮江都統

兼知揚州三年金人圍襄陽犯廬和真西和州德安府

陷隨濠階成州信安豐軍大散關郭倪棄揚州走

齊東野語

紹熙四年春二月李全平先是京東忠義軍都統制季先者亦歸朝入爲樞密都統制史彌遠以事誅之李全懼有異志使其弟李平潛爲謀於都堂朝議以文臣不

知兵選武臣制之乃以許國換授太府卿揚州置使移司楚州既至全入謁因與客杜來議延見之禮來曰彼狼子野心宜責其橫挺庭參全怒殺許國屠其家國被執窘曰杜來教我乃以蒙東來而生燕之遂叛後全圍揚州時趙葵守城因元宵放燈全移營灣頭亦放燈趙葵掛榜城上曰許百騎入城觀燈聞李全喜着白袍一夕八十騎皆皂袍游城出去一夕百騎皆紅袍又次夕百騎皆白袍葵設伏閉城盡殺之至第三年修城見金甲玉帶方知全死於此

宋季三朝政要

嘉定間山東忠義李全跋扈日甚朝廷擇人帥山陽見



大夫無可使遂用許國國武人也特換文資除大府卿以重其行國至山陽偃然自大受全庭參全軍忿怒囚而殺之幙客杜子莖詩人也亦死焉李全自此遂叛常曰吾不患兵不精唯患財不贍有士人教之以依朝廷式樣造楮券全從之所造不勝計持過江南市物人莫能辨其用頓饒而江南之楮益賤上下共以全為憂辛卯上元夜酒酣自提兵攻維揚忽陷於城外淖中而死

崔林 玉露

李全淄州人行第三以販牛馬來青州有北永州牛客張介引至漣水時金國多盜道梗難行財本寢耗遂投

充漣水尉司弓卒因結羣不逞為義兄弟任俠狂暴剽掠民財黨與日盛莫敢誰何號為李三統轄後復還淄業屠常就河洗刷牛馬於游土中蹴得鐵槍桿長七八尺於是就上打成槍頭重可四十五觔日習擊刺技日以精為眾推服因呼為李鐵槍遂挾其徒橫行淄青間出沒抄掠淄青界內有楊家堡居民皆楊氏以穿甲製鞞為業堡主曰楊安兒有力強勇一堡所服亦嘗為盜於山東聚眾至數萬有妹曰小姐姐年可二十膂力過人能馬上運雙刀所向披靡全軍所過諸堡皆載牛酒以迎獨楊堡不以為意全知其事故攻劫之安兒亦出



民兵對壘謂全曰你是好漢可與我妹挑打一番若贏時我妹與你爲妻全遂與酣戰終日無勝負全忿且慙適其處有叢篠全令二壯士執鈎刀夜伏篠中翌日再戰全佯北楊逐之伏者出以刀鈎止大呼全回馬挾之以去安兒乃領眾備牛酒迎歸成姻遂還青州自是名聞南北時金人方困於敵張介又從而招之授以兵馬衣以紅袍號紅襖軍嘉定十一年間金人愈窮蹙全因南附乃與石珪沈鐸輩結黨以來知楚州應之純遂納之累戰功至副總管明年金主珣下詔招之全復書有云寧作江淮之鬼不爲金國之臣遂以輕兵往濰州遷

其父母兄嫂之骨葬於淮南以誓不復北向時山東已爲北兵所破金不能有全遂下益都張林出降遂併獻濟莒滄濱淄密等凡二府九州四十縣降頭目千人戰馬千五百匹忠勇軍十五萬人聞於朝遂以全爲左武衛大將軍廣州觀察使京東忠義軍都統制馬步軍副總管特賜銀絹緡錢等先是賈涉知鹽城縣以事忤淮漕方信孺劾之未報涉廉知信孺陰遣梁昭祖航海致餽以結李全遂遣人捕得之亟申於朝方由是罷涉召入爲大理司直未幾知楚州時忠義軍頭目李先拳勇有膽氣且併領石珪沈鐸之軍李全深忌之至是極力



增補正身集卷之五  
擠先涉遂以李先反側聞於朝於是召先赴密院審察甫至都門殿帥馮樹宴之三茅觀後小寨命勇士撲殺之於是全愈無忌憚矣先既誅漣水人情不安頭目裴淵等遂請石珪爲帥於盱眙制司大恐遂令李全率萬人以往全憚珪不敢動制司無策遂分其軍爲五乃呼裴淵赴山陽稟議責以專擅招珪令密圖之以功贖罪會北兵至漣水珪亦自疑遂殺淵以歸北先是權上書胡榘嘗言全狼子野心不可倚仗及全獲捷於曹家莊擒金人僞駙馬旣而涉以病歸遂以鄭損繼之損與涉素不相能幙中諸客懼損修怨乃嗾李全申請乞差真

德秀陳韓梁丙知楚州於是朝廷遂改損爲四川制置乃以知閣門事許國用徐本中例換授朝議大夫再轉爲太府少卿知楚州國自是歉然懼儕輩經已開闔之初命管軍已下皆執朝參之禮時全已爲保寧軍節度使前闔皆與抗禮至是幕府宋恭荀夢玉等懼變遂調停約全拜於庭下國荅拜於堂上議已定及庭參國乃傲然坐而受之全大慙憤竟還青州至冬國大閱兩淮軍馬全妻李姑姑者欲下教場犒軍實求豐耳幕府復調停力止及淮西軍回人僅得交子五貫乃盡以弓刀售之李軍而淮西亦怨矣未幾全將劉慶福自青來謀



以丁祭之夕作亂以謀泄而止既而制府出榜以高顯爲詞指摘北軍慶福亦大書一榜揭於其右語殊不遜次日慶福開宴於萬柳亭游幕諸客及青州倅姚翀在焉酒行方酣忽報全至海州促慶福北還時國方納謁北軍徑自南門入直趨制府強勇軍方解甲望見北軍皆棄去遂排大門而入帳前親兵欲禦之國乃大呼曰此輩不過欲多得錢絹耳方行喝犒聞北軍大喊登城張旗幟火已四起飛矢如雨國額中一箭徑趨避於楚臺北軍劫掠府庫焚燬殆盡國在楚臺久之使令姚翀求和翀遂縋城而出以帛繫書青州姚通判以長竿揭

之馬前往見李姑姑李遜謝不能統轄諸軍以致生變姚遂請收軍李云只請制置到此商量便可定也姚亟回報則國已遁矣次日北軍得國於三茅道堂以小竹輿輿至李軍國不能發一語復送還楚臺以兵環守國遂死焉文武官遇害者凡數十人未幾全乃入弔行慰奠禮且上章自劾朝廷不敢問也遂進全爲少保而以大理卿徐希稷知楚州軍變之先一日荀夢玉已知其謀亟告於國國不以爲然至是全得其告變之書欲殺之而夢玉已歸滁乃命數十騎邀於路而殺之制府捐三千緡捕賊而全亦捐五千緡無狀大率如此希稷至



增修甘肅通志 卷之五  
楚一意逢迎全益以驕既而還青州或傳爲金人所擒  
或以爲已死劉瑄乘時自誇以驅除餘黨及丞相入其  
言遂召希稷而以瑄爲代瑄卽以盱眙軍馬自隨中途  
所乘馬無故而踏瑄怒遂斬二濠寨官人疑其非吉徵  
也瑄初至軍聲頗振不數日措置乖方南北軍已相疑  
適忠義總管夏全自盱眙領五千人來先是全欲殺夏  
瑄爲解免之至是留以自衛且資其軍以制全然夏軍  
素驕時作過惡劫掠居民瑄乃捕爲首數人斬之猶未  
戢乃劄忠義都統權司張忠政謀所以拒制司之策忠  
政曰朝廷無負北軍夫人若欲忠政反惟有死耳遂歸

家令妻子自經次焚誥敕寶貨於庭然後自盡制司聞  
變遂戒嚴命夏全封閉李全劉全張林等府庫且出榜  
令北軍限三日出城是時諸營搬移自東北門出夏軍  
出門首搜檢凡金銀婦女多攘取之餘皆疑懼不敢出  
而制司又驅逐之有黑旗一對僅百人乃北軍之精銳  
者堅不肯出潛易衣裝與夏軍混雜南軍欲注矢揮刃  
則呼曰我夏太尉軍也南軍遂不疑之至晡大西門上  
火忽起至夜遂四面縱火殺害軍民瑄遂命守子城護  
府庫凡兩日夜軍皆無火飯饑困不復用命夏全知事  
急遂挺身入北軍李姑姑遂與夏劇飲酒酣泣曰少保



今不知存亡妾願以身事太尉庫府人馬皆太尉物也本一家人何爲自相戕乎今日勦除李氏太尉能自保富貴乎夏全惑其說乃陰與李軍合反戈以攻南軍瑋屢遣人招夏議事竟不至乃以十萬貫犒軍求和夏全乃令開一路以馬軍二百衛送瑋出大西門星夜南奔至寶應已四鼓矣從行官屬惟余元虞沈宣子餘悉死焉夏軍回至淮陰乃爲時青令暉夾擊盡得所虜財物七巨艘旣至盱眙范成張惠閉門拒之且就軍中殺其母妻於是夏全乃輕身北竄劉瑋遂移司於揚之堡寨朝廷遂改楚爲淮安州命將作少監姚狝知州事時李

全猶未還王義深國安用爲權司劉慶福與能甫謀就楚之淮河縛大浮橋或告李姑姑以二人欲以州獻金人姑姑卽遣人請姚狝議事狝不獲已而往則大廳已設四果卓餘二客則慶福及甫也慶福先至姑姑云哥哥不快可去問則個謂李福也時福臥於密室凡迂曲數四乃至慶福至榻前云哥哥沒甚事福云煩惱得恁地劉覘福榻有劍出稍心動亟出福急揮劍中其腦旣而甫至於外呼云總管沒甚事否福隱身門左俟其入卽揮劍又仆之福遂攜二首以出大張樂劇飲姚遂揭榜以劉張欲謀作逆密奉朝旨已行誅戮乃聞於朝李



福增秩姑姑賜金進封楚國夫人未幾福復以預借糧券求覺遂召北軍入城官民死者甚眾姚翀賴國安用匿之而免於是朝廷諸閩各主勦除分屯之說久之不決既而盱眙守彭恂乃遣張惠范成入淮安說國安用合殺李福及李姑姑未幾李福就戮而姑姑則易服往海州矣其後分屯之說已定而江閩所遣趙濤夫勦殺之兵適至北軍怒爲張范所賣欲殺之二人遂遁去國安用追至盱眙彭恂宴之方大合樂忽報軍變始知張范已獻盱眙於北矣彭恂遂爲所擒既而李全至楚揭榜自稱山東淮南行省於是盡據淮安海州漣水等處

先是全遣張國明入朝稟議嫚書至朝廷未有以處之會時青亦遣人至國明遂遣人報全全遂殺青國明極言李全無它意朝廷遂遣趙拱奉兩鎮節鉞印綬以往而江閩乃遣申生結全帳下謀殺之事覺全囚申生以其事上於朝蓋全時已有叛志矣會鹽城陳遇謀於東海截奪全青州運糧之船全由是愈怒遂興問罪之師首攻海陵守臣宋濟迎降遂進圍揚州朝廷始降詔削奪全官爵往給錢糧會諸路兵誅討然戰多不利內外爲之震動是時全合諸項軍馬併驅鄉民二十餘萬一夕築長圍數十里圍合揚之三城爲必取之計會元夕



增補通志卷之五  
欲示閑暇於城中張燈大宴全亦張燈於平山堂中夜  
全乘醉同馬步極力薄城趙范命其弟葵領兵出城迎  
戰至三鼓勝負未決葵先命李虎丁勝同持兵塞其甕  
門至是全欲還而門已塞進退失據且戰且退遂陷於  
新塘由是各散去次日於沮洳亂屍中得一紅袍而無  
一手指乃全也時紹定四年正月後三日北軍悉遁制  
府露布聞於朝遂乘勝復秦之鹽城後三月淮南諸州  
北軍皆空城而去矣其雛松壽者乃徐希稷之子賈涉  
開閫維揚日嘗使與諸子同學其後全無子屢託涉祝  
之涉以希稷向與之稔遂命與之後更名瓊云

齊東野語

咸淳十年十二月辛未揚州阮克已糾集民兵義兵三  
萬勤王

宋季三朝政要

德祐元年正月元兵乘勢順流至瓜洲揚州都統姜才  
領兵二萬大戰楊子橋勝負相乘生兵益增遂退師上  
李庭芝守揚州廣王登極除庭芝爲右相棄揚州引兵  
輕出至泰州欲航海至海州大兵追及阿朮元帥斬於  
軍前朱煥以揚州城獻姜才死之才淮之猛將前後出  
師屢收大功乙亥春戰於瓜洲不利丙子三月三日三  
宮過揚州才統軍數千奪駕繼以兵馬相距而退初四  
日才出揚州北門領軍擁出分陣殺奪交傷不少波羅



相公親臨陣大戰方退才意欲奪駕不知乃諸將之過北也至八月大軍圍揚州大戰之日才身生九疽不可掛甲遂敗被執臨刑含血罵聲不絕而死

同上

元史弼從伯顏南征至揚州阿塔海言楊子橋乃揚州出入之道宜立堡選將守之伯顏授弼三千人立木堡據其地弼遽以數十騎抵揚州城或止之曰宋將姜才倔強未可易也弼曰吾柵楊子橋據其所必爭之地才乘未固必來攻我則我之利也才果以萬眾乘夜來攻人挾束薪填塹弼戒軍中無譁俟其至下梟木發炮石擊之殺千餘人才乃退弼出兵擊之會相威阿朮兵繼

至大戰才敗走擒其將張都統十三年六月才復以兵夜至弼三戰三勝天明才見弼兵少進迫圍弼弼復奪擊之騎士二人挾火鎗刺弼弼揮刀禦之左右皆仆手刃數十百人及出圍追者尙數百騎弼殿後敵不敢近會援兵至大破之才奔泰州

元史

至元十年七月阿朮奉命略淮東抵揚州城下宋以千騎出戰阿朮伏兵道左佯北宋兵逐之伏發擒其騎將王都統

同上

至元十二年伯顏伐宋十月庚戌圍揚州召諸將指授方略留孛魯歡阿里伯守灣頭新堡眾軍南行

同上



至元十二年二月世祖以宋重兵皆駐揚州臨安倚之  
爲重四月命阿朮分兵圍守揚州十月詔拜中書左丞  
相仍諭之曰淮南重地李庭芝狡詐須卿守之十三年  
二月夏貴舉淮西諸城來附阿朮謂諸將曰今宋已亡  
獨庭芝未下以外助猶多故也若絕其聲援塞彼糧道  
尙恐東走通泰逃命江海乃柵揚之西北丁村以扼其  
高郵寶應之餽運貯粟灣頭堡以備捍禦留屯新城以  
逼泰州又遣千戶伯顏察兒率甲騎三百助灣頭兵勢  
且戒之曰庭芝水路旣絕必從陸出宜謹備之如丁村  
烽起當首尾相應斷其歸路六月甲戌姜才知高郵米

運將至果夜出步騎五千犯丁村柵至曉伯顏兒來援  
所將皆阿朮牙下精兵旗幟畫雙赤月眾軍望其塵連  
呼曰丞相來矣宋軍識其旗皆遁才脫身走追殺騎兵  
四百步卒免者不滿百人壬辰李庭芝僅入泰州遂築  
壘以守之七月乙巳朱煥以揚州降乙卯泰州守將孫  
良臣開北門納降執李庭芝姜才奉命戮揚州市同上  
至元十二年七月行省檄懷都領軍護焦山江岸仍往  
揚州灣頭立木城以兵守之元史本傳

至元十四年八月置行御史臺於揚州元史

至元十五年十一月行中書省自揚州移治杭州立淮



東宣慰司於揚州

元史本紀

至元續志考正史誤有辨見沿革內

元史

至元十八年二月以合必赤軍三千戍揚州

元史

至元二十一年二月辛巳浚揚州漕河

資治通鑑後編

至元二十三年七月江淮行省忙兀帶言今置省杭州

兩淮江東諸路財賦軍實皆南輸又復北上不便揚州

地控江海宜置省宿重兵鎮之且轉輸無往返之勞行

省徙揚州便從之

元史

至元二十六年二月癸亥改浙西道宣慰司為淮東道

宣慰司治揚州

資治通鑑後編

至順二年十一月戊寅樞密院臣言天厯兵興以揚州

重鎮嘗假淮東宣慰司以兵權今事已寧宜以所部兵

復隸河南行省

元史

至正十二年三月乙酉立淮南江北等處行中書省治

揚州

資治通鑑後編

至正十三年六月辛卯朔張士誠寇揚州丙申達識帖

睦邇以兵討張士誠敗績諸軍皆潰詔浙江行省參知

政事佛家間會達識帖睦邇復進兵討之

元史

至正十四年六月張士誠寇揚州

元史

至正十五年四月詔翰林待制烏馬兒集賢待制孫搆



招安張士誠仍賚宣命印信牌面與鎮南王孛羅不花及淮南行省廉訪司等官商議給付之

同上

至正十五年五月張士誠攻破揚州路殺淮南行省參政趙連士義被獲伏誅

同上

至正十五年十月立淮南行樞密院於揚州

同上

元鎮南王孛羅普化鎮揚州至正十六年丙申三月明鑑等以食盡謀作亂逐鎮南王而據其城鎮南王出走至淮安爲趙君用所殺

國初羣雄事略

至正十七年甲申江南行省平章閱軍於大通江遂命元帥繆大亨率兵攻揚州路克之青軍元帥張明鑑以

其眾降先是至正十五年明鑑聚眾淮西以青布爲號名青軍人呼爲一片瓦其黨張監驍勇善用槍又號長槍軍暴悍專事剽掠由含山全椒轉掠六合天長至揚州人皆苦之時鎮南王孛羅普化鎮揚招降明鑑等以爲濠泗義兵元帥俾駐揚州分屯守禦久之明鑑等以食盡復謀作亂說鎮南王曰朝廷遠隔事勢未可知今城中糧乏眾無所託命殿下世祖孫當正大位爲我輩主出兵南攻以通糧道救饑窘不然人心必變禍將不測鎮南王仰天大哭曰汝不知大義若如汝言我何面目見世祖於宗廟耶麾其眾使退明鑑等不從呼譟而



起因逐鎮南王而據其城鎮南王走淮安為趙君用所  
殺明鑑等凶暴益甚屠城中居民以為食至是兵大敗  
不支乃出降得其眾數萬戰馬二千餘匹置淮海翼元  
帥府命元帥張德林耿再成守之改揚州路為淮海府  
以張德林知府事按籍城中居民僅存十八家德林以  
舊城虛曠難守乃截城西南隅築而守之資治通鑑後編  
至正十七年明太祖克揚州明鑑降橫雲山人史稿  
壬辰九月甲申上閱軍於大通江遂命元帥繆大亨率  
師取揚州克之青軍元帥張明鑑降得其眾數萬戰馬  
二千餘匹報至置淮海翼元帥府命元帥張德林耿再

成守之 明遺事

明洪武九年春二月蠲畿內淮揚安徽州五府今年田

租 橫雲山人史稿

建文四年五月己丑燕兵敗盛庸軍於淮上遂渡淮趨  
揚州己亥指揮王禮等叛降燕御史王彬指揮崇剛死  
之 同上

正德十四年十二月辛酉上次揚州大索處女寡婦壬  
戌獵城西戊寅閱女伎於揚州 同上

正德十四年南征十二月辛酉至揚州府太監吳經前  
選民居壯麗者為總督府上以數騎獵城西遂幸上方



寺命總兵神周搜括泰州鷹犬乙酉渡江弇山堂別集

正德十五年閏八月駕還癸丑至揚州仍寓總督府丁

已撫按等官設宴慶功用金銀牌各二軸一旄帳綵帛

若干匹其餘折價以進戊午發揚州同上

武宗幸揚州買民舍自居仍以契付稅課局批稅藏之

明良記

嘉靖三十五年四月倭薄揚州城都指揮張恒千戶羅

大爵會沂禦之於教場兵潰死之時倭一從瓜洲入一

從新港入一從通州入至東關居民奔逃被殺及溺死

者數千人渡河西四散放火殺掠衛官張恒等領兵到

營教場中忽見有揮扇持刀連接單行入教場後門者  
官兵不知爲倭也及覺倉卒點砲放箭無能中倭者倭  
揮眾前進圍殺官兵潰敗恒等俱死於圍中倭追敗口  
兵出轅門過戴家樓上集山陝善射鹽客亂射之倭始  
退倭情考略

五月倭復犯揚州同知朱衷等死之先次掠揚之倭屯  
舟江干入掠滿慾捉市民負戴送入舟中矣十餘日後  
倭復至揚衷與高郵衛經歷晏銳率千戶賈勇應襲男  
恩及官兵出城渡河東禦之忽被倭眾一擁前來殺散  
官兵將衷與銳擄至井巷口被害至今巷口立雙忠祠



祀之 同上

嘉靖三十六年五月倭犯揚州參將王完伯禦之於河東轉戰至鐵盤廠敗之 倭情考略

嘉靖三十六年八月乙未浙直總督胡宗憲淮揚巡按馬斯臧各以江北倭患平定來聞詔留參將徐珏所領保定兵駐揚州防冬汛 倭亂備抄

國朝順治元年故明福藩自立於江南遣興平伯高傑鎮揚州士民拒之不納進士鄭元勛勸守臣和解時共坐城樓忤眾立刃元勛死傑兵縱掠廣陵大沸 順治二年四月

王師下江南圍揚州城破督師閣部史可法死之揚州入

我版圖

以上原志







卿請捕治建天子不忍使大臣即訊王王服所犯遂自殺國除地入於漢為廣陵郡 史記五宗世家

平帝時興滅繼絕立建弟盱眙侯子宮為廣陵王奉易王後莽篡國絕 漢書景十三王傳

元朔四年三月封城陽恭王子裘為廣陵侯 冊府元龜

元狩六年夏四月乙巳廟立燕王胥為廣陵王 漢書武帝紀

始元二年二月益封廣陵王胥萬三千戶元鳳中入朝

復益萬戶 漢書昭帝紀

胥壯大好倡樂逸游力扛鼎動作無法度始昭帝時見上年少無子有覲覲心迎女巫李氏須使下神祝詛會

昭帝崩殺牛賽禱及昌邑王徵復使巫祝詛之後王廢寢信女須等宣帝即位胥曰太子孫何以反得立復令女須祝詛如前居數月祝詛事發覺有司按驗胥惶恐藥巫及宮人二十餘人以絕口公卿請誅胥天子遣廷尉大鴻臚即訊胥胥既見使者還即以綬自絞死天子加恩赦王諸子皆為庶人賜諡曰厲王立六十四年而誅國除後七年元帝復立胥太子霸是為孝王十三年薨子共王意嗣三年薨子哀王護嗣十六年薨無子絕後六年成帝復立孝王子守是為靖王靖王立二十年薨子宏嗣王莽時絕 漢書本傳



廣陵王胥凡六傳一百一十九年 文獻通考

建武十七年進封山陽公荆為廣陵王 後漢書本傳

按王光武子立二十九年坐使巫祭祀祝詛

自殺諡思

永平十四年封荆子元壽為廣陵侯元壽卒子商嗣商

卒子條嗣傳國於後 後漢書本傳

晉太康十年十一月甲申立皇孫適為廣陵王 晉書武帝紀

適字熙祖惠帝長子母謝才人幼而聰慧武帝愛之恒

在左右嘗對羣臣稱適似宣帝時望氣者言廣陵有天

子氣故封為廣陵王邑五萬戶 晉書本傳

按惠帝即位改元永熙八月壬午立廣陵王

適為皇太子

太康十年十一月甲申以琅邪王觀弟淮為廣陵公 晉書

武帝紀

陳騫明帝時封安國亭侯諸葛誕之亂復以尚書行安

東將軍壽春平進爵廣陵侯 晉書本傳

魏廣陵王羽字叔翻太和九年以皇弟封少聰慧有斷

獄稱以羽為大理典決京師獄訟孝文將南討遣羽持

節安撫六鎮發其突騎還領廷尉卿遷青州刺史宣武

即位遷司州牧及帝攬政請為司空薨於府宣帝親臨



其喪贈司徒諡惠子恭襲 北史本傳

恭字修業少端謹有志度長而好學事祖母嫡母以孝聞正始中襲爵正光二年託瘖病有白莊帝以王不語將有異圖執送京師恭帝崩余朱世隆奉王即帝位後為齊獻武所廢是為前廢帝 魏書本紀

恭兄欣字慶樂性麤率好鷹犬孝莊初封沛郡王改封淮陽王孝武時加太師開府復封廣陵王恭帝初遷大丞相薨諡容 北史本傳

按魏書本傳云欣隨出帝沒於關中而周書有廣陵王元欣蓋即其人也

陽平王子衍字安樂太安三年賜爵廣陵侯 北史本傳

衍景穆孫也性清慎所在廉潔又不營產業亡無殮具 冊府元龜

婁伏連代人積功封廣陵公太延元年進爵廣陵王子真嗣 魏書世祖紀

魯秀小字天念仕魏以軍功封廣陵侯 南史魯爽傳

宋廣陵王誕字休文文帝第六子年十一元嘉二十年封 南史本傳

周宗室孝伯掌留臺事授大將軍進廣陵郡公 北史宗室傳

孝伯字胡玉測弟深之子其生與武帝同日太祖甚



愛之養於第內及長又與武帝同學帝謂之曰公與我猶漢高與盧縮也賜以十三環金帶自是常侍左右出入臥內朝務皆得與焉孝伯亦竭心力無所迴避時政得失外聞細事皆以奏聞帝甚信委之及將誅晉王護密與衛王直圖之惟孝伯與王軌宇文神舉等頗得參預大事東討令掌留臺軍還帝曰居守之重無忝戰功於是加授進爵每車駕巡幸嘗執其手令居其中 冊府元龜

隋韓僧壽聞皇初轉蔚州刺史進爵廣陵郡公十七年改江都郡公 隋書

唐江都王緒霍王元軌第六子有名譽為金州刺史誅神龍初並復官爵以緒孫暉嗣王 唐書高祖諸子傳

廣陵王健儀王璉子儀王薨並封其二子健王廣陵 唐書

十一宗諸子本傳  
憲宗孝皇帝諱純順宗長子也母曰莊憲皇太后王氏貞元四年六月己亥封廣陵郡王 唐書憲宗本紀

楊行密字化源廬州合肥人昭宗在岐遣江淮宣諭使李儼拜為東南行營諸道總統檢校太師中書令封吳王卒諡武忠長子渥代立渥被殺諡景弟隆演代立卒諡宣弟溥代立凡四主國遷於南唐 五代史吳世家



宋太宗子元儼行第八真宗即位封曹國公明年封廣陵郡王進封榮王 宋史宗室傳

太宗子商王元份房廣陵郡王謚莊孝宗諱 宋史宗室世系表

建中靖國元年六月甲寅封吳王灝子孝騫為廣陵郡王 宋史本傳

郭思禹祥符人孝宗后郭氏之弟光宗內禪除思禹節度使進少傅加太保封廣陵郡王 宋史后妃傳

明陳公以高皇帝母淳皇后父追封揚王宋濂撰神道碑 續文獻通考 以上原志

續志考正自江都廣陵肇始西京其後遞有封錫

不盡來洩此邦也楊吳開國有年更當詳志然皆外郡所產耳至生長本土尊榮崇顯穹爵有加亦宜一體列敘如明代侯伯之封指揮之職大小雖殊其傳世一也舊聞即多放軼而于體例殊疎選舉門內所載襲蔭尤不盡可倫比別整比以入輯補

按前志封爵一門自漢廣陵江都皆分封出鎮至後則多遙領而已唐宋以前凡官貴者多帶郡國之爵封而不襲今自元鎮南王下錄其世系可譜者明顧成蔣貴等前志雖入武勳于傳授次序皆



畧焉準史表補入而以各指揮所隸并附之

元

脫歡封鎮南王至元二十八年詔江淮行省遣蒙古軍

五百漢兵千人從皇子脫歡鎮揚州元史表作二十一年與本紀異

德五年薨子老章襲至大三年尚書省言老章出入導

衛僭竊上儀敕遣官詰問有驗召赴闕以脫不花襲表云

缺又帖木兒不花襲亦缺天歷二年改封宣讓王以孛

羅不花襲至正十七年為濠泗兵所逐走淮安

明

顧成以永樂二年封鎮遠侯十二年卒長子統先因成

降燕誅其子興祖嗣侯屢以事下獄降伯爵天順初復

侯孫瀄嗣瀄無子以從弟溥嗣卒子仕隆卒子寰嗣自

溥至寰三世皆寬和廉靖內行謹飭曉文藝通賓客世

督漕善于其職寰無子從子承先嗣卒大理嗣卒肇跡

嗣甲申死于兵

蔣貴以正統三年封定西伯尋進侯貴卒孫琬嗣卒驥

嗣卒叡嗣卒傅嗣傅無子弟佑襲卒建元嗣卒承勳嗣

卒維恭嗣卒秉忠嗣在崇禎十三年

仇鉞以正德五年封咸寧伯進侯子恩篤疾孫鸞嗣嘉

靖間除



許成以永樂三年封永新伯世指揮使子貴襲爲羽林衛指揮使屢遷都督同知子寧嗣從軍大小百十餘戰身被二十七創名聞異域子泰襲指揮使封安邊伯正德中賜姓朱嘉靖初除

江都公主懿文太子女下降耿炳文子璿初封郡主建文時進公主至永樂初復降郡主璿以罪死璿弟璵亦以罪死炳文幼子良世襲鎮江衛指揮使楊子橋旁之耿官營其故屯也今陝州知州耿育仁卽其後裔

趙輝駙馬都尉子琮府軍後衛正千戶子鍾襲子麟襲並以國戚陞指揮弟鳳襲改南京錦衣衛加僉事子承序襲授都督府都事子崇謙襲錦衣衛千戶按輝父和洪武三十五年授武德將軍泗州衛正千戶調府軍後衛征交趾陣亡

揚州衛隸中軍都督府設指揮使一員其下爲指揮同知指揮僉事鎮撫千戶所正千戶副千戶等目千戶有左右中前後五所所各一鎮撫皆由軍功世襲後亦間以納粟襲任前志所載如指揮馬子開喬基火晟等皆以外籍承襲世爵傳序不盡可考今考嘉靖維揚志及萬厯府志中有本籍江都隸在揚州衛世襲者其中卽有甘泉人錄補以



存故實

馬剛吳元年授百戶子遇隆洪武二十一年襲升副千戶子能襲子昇襲姪鑽襲子勇襲子德良襲例減百戶子軒襲弟轅襲子千乘襲

按前志馬岱即德良從姪榮祖即千乘之裔

嘉靖維揚志

揚州指揮使李忠歷鎧 漢 淮 光榮 紹元

指揮同知徐清歷恭 良臣 乾

左副千戶葉紹賢歷蘭 必大由納粟

後副千戶王秉昇歷信 福名 榮希 爵

後百戶韓春歷榮 亦大 亦仁 賞晟

泰州守禦千戶所鎮撫王樞 其四兩志詳載不五十五

儀真鎮撫栢興歷昇 壽 森 志 獻 不 嵩 牙

前千戶所百戶高興歷貴 勝 志 欽 爵 啟泰

興化守禦千戶所正千戶馬祖蔭

百戶宋克賢

萬歷府志

揚州衛指揮同知徐敏今鳴宇襲

左所副千戶葉桐今承祖襲

試百戶葉機今時行襲



高郵衛左所百戶吳珍今世祿襲

高郵衛左所百戶孫慶今某襲

中所百戶繆得今嘉謨襲

後所鎮撫徐第兒今應科襲

儀真衛中所百戶宋宣今某襲

泰州守禦千戶所鎮撫王倫今日康襲

興化守禦千戶所正千戶馬旺今負圖襲

按萬厯府志十人為嘉靖志所不載至嘉靖志所載十人萬厯志亦僅見其四兩志相距不五十年

已不審考然亦一代爵賞之舊也以上續志

事略附

咸豐三年春二月粵賊林鳳祥等率眾陷揚州揚州營

參將朱占鼇便北汛把總田登仕江都教諭黃元灝死

之  
平定粵  
匪紀略

粵賊洪秀全既陷金陵與楊秀清計遣偽丞相林鳳

祥羅大綱李開芳曾立昌等率賊東下時鎮江已陷

二十日陷儀徵二十三日陷揚州先是揚人江壽民

畫饋賊之策鹽知事銜張翊國上書大吏極斥其不

可時漕運總督楊殿邦防堵揚州翊國自率勇縛壽

民獻於殿邦殿邦釋之賊至殿邦倉卒退守壽民自



北傳身果元 卷之五  
縊死賊既得鎮揚乃分據浦口瓜洲儀徵各要隘徧  
立土壘以阻我南北之師時兩淮運使劉良駒及前  
任運使但明倫同在防所賊於二十三日申刻陷城  
漕臣及兩運使皆乘舟先至上遊退守府縣不知所  
終奉

旨分別遣戍革職

馬國棠浙江石門人四品銜兩淮候補運判奉委團練  
郡城陷與八品銜陳長生率眾抵敵長生與民勇張  
秉鑑皆受傷殞命國棠與蘇州人孫守源罵賊不屈  
皆被戕守源母宋氏自縊死奉

旨給國棠後雲騎尉

兩江總督奏案

謝豐昇安徽祁門人兩淮候補鹽經歷賊至被執罵賊  
不絕賊支解之拋棄城下僕趙誠亦被害 給雲騎  
尉

黃槐浙江仁和人兩淮候補鹽經歷賊入城蜂擁槐寓  
槐拒賊遇害妻盧氏子子才女長姑二姑三姑姪全  
俱自縊死 給雲騎尉

方文藻浙江淳安人附監生兩淮候補鹽經歷城陷持  
刃抵禦賊眾至矛戟並舉死之弟自源長子元杰次  
子元桂均以奔救受重傷同日殞命妻殷氏自縊死



給雲騎尉

汪承霖候補州同賊脅之不從與妻巴氏同死續揚城殉難錄

黃曙江西宜黃人州同銜南河候補縣丞城陷絕粒死

長子從九品俊次子儒童偉亦自盡兩江總督奏案

董培安徽天長人前江蘇候補縣丞丁母憂起復應赴

原掣滇省路經揚州漕督留揚差遣城陷被執不屈

死 給雲騎尉

黃元灝太倉人舉人江都縣學教諭城破登明倫堂自

縊死續揚城殉難錄

嚴增浙江仁和人兩淮候補鹽大使奉委巡街城陷帶

勇抵禦且詈且戰力不敵賊憤刀並下菹醢而死子

志仁並遇害 給雲騎尉兩江總督奏案

喬淑顏山西介休人兩淮候補鹽大使城陷罵賊被害

妻王氏亦受戕死子汝植不知所終 給雲騎尉

顏晉敏廣東連平州人布政司理問銜兩淮候補鹽知

事賊迫降不從罵賊被戕母葉氏及妻葉氏媳梁氏

子培詩培謨培誥培史女淮姑婢金桃蘭香春喜秀

英同聲罵賊闔門遇害 給雲騎尉

章芳浙江山陰人兩淮候補鹽知事城陷積薪自焚鄰

右救滅芳鬚髮已燃大呼曰吾官雖卑甘為賊屈耶



竟絕粒死婢女蓮喜殉焉城復得屍面如生其姊為故運庫大使張寶忠妻與子張良鈺並絕粒死事聞

贈芳按察司知事

胡光第浙江石門人兩淮候補鹽知事奉委鈔關門巡查城陷被執不屈死妻妾子女俱被殺

贈按察司知事

江紹武浙江錢塘人兩淮候補鹽知事奉委巡查賊入城團勇退散紹武指揮大罵賊殺之僕陳福救護不及手刃數賊亦被戕死城復其妻曹氏覓夫尸不得自縊以殉

給雲騎尉

見揚城殉難錄

鄭兆升浙江嘉興人兩淮候補鹽知事帶勇防堵城陷

與弟監生兆觀兆吳候補齋奏廳兆乾同時被殺妾

陳氏王氏兆晉妻濮氏兆乾妻黃氏某妻黃氏俱自

縊死

給兆升後雲騎尉

兩江總督奏案

陳慶繼浙江紹興人兩淮候補鹽知事城陷與兄監生

慶履俱罵賊被殺

給慶繼後雲騎尉

朱壇順天通州人候選鹽知事流寓揚州城陷被脅不

從身受重傷越日餓死叔母盛氏女大姑俱絕粒死

給雲騎尉

祝純嘏浙江仁和人江蘇候補主簿與弟候選教諭同



治俱寓揚州城陷罵賊被殺同治側室華氏僕婦彭氏俞氏僕張松順子一同被戕媳袁氏孫汝虔投井死 給純嘏後雲騎尉

此次殉難職官尚有兩淮候補運判周詒孫禦賊被戕妾女俱自盡候補鹽大使武林候補庫大使張式瑛皆遇賊不屈被害候補批驗大使陳大馨罵賊不屈死妾及子同殉候補鹽知事恩善率子先死妻妾某氏甥某及孫女同時自盡候補鹽知事諸嘉祿罵賊不屈死長女增姑痛憤自縊候補鹽知事孫紹恆罵賊被戕子因培康培嶺培同時被害妻妾媳女六

口自縊孫女三口投井死候補鹽經歷邵錕殺賊多名眾寡不敵被戕妻媳孫女六口同時殉難錕堂姪虞生邵沅婿生員郎鎮均自縊死候補府經歷王鴻漸禦賊被戕

馮槐浙江餘姚人江淮衛四幫千總以衛守備升用奉委守提江甘兩縣銀兩留寓揚城賊至逼降不從自

縊死

給雲騎尉

兩江總督奏案

田登仕嘉慶戊寅科武舉咸豐三年委署便北汛把總與外委孟德慶巡防便益門外賊至領兵截殺賊由南門鈔關入城登仕復繞道出賊前後夾攻眾寡不



敵兵丁皆受傷潰散與德慶突圍出衣刃俱血賊不敢逼或勸移駐他汛以圖後功登仕誓不欲生遂自縊女大姑從死 給雲騎尉

孟德慶揚州營額外外委與田登仕率兵巡防賊至領兵截殺眾寡不敵偕登仕突圍出與母陳氏戚李正芳並自縊死

吳雨亮揚州營候補外委在城圍練為賊所殺妻譚氏聞夫被害亦自縊死

馬湘揚州營額外外委奉委巡城城陷罵賊不屈死李澍甘泉人候補外委六品軍功頂戴充鹽捕營稿書

在署守護軍裝賊至署挺身迎擊被害于莊投水死

胡根培九品軍功頂戴與戚韓彭年同居辦團賊至培

大呼迎戰不敵與母饒氏並子女四人彭年妻汪氏

女一均被殺

練勇柴淦高五彩趙金保范元並在局隨同堵禦受傷

殞命地保居升因賊攻局鳴鑼集眾亦被戕

兩江忠義局案

鹽捕營守兵陳文銓巷戰陣亡

三月大學士琦善直隸提督陳金綬內閣學士勝保先

後率援師至揚州擊賊勝之

平定粵匪紀略

大學士琦善以



欽差大臣統率直隸河南陝西黑龍江馬步各兵由河南信陽  
援揚州初九日陳金綬勝保營於北路帽兒墩雷塘  
集初十日破西北賊壘十二日五戰五勝復營於堡  
城司徒廟壘破東路賊壘南路濱近運河賊船林立  
焚勦略盡城外全無賊蹤

三月初九日陳勝二軍移營至帽兒墩時琦善營於  
雷塘集均距賊營數里分勦城西之賊琦善飭肅州  
鎮總兵雙來勦城北之賊皆敗之二十二日大軍乘  
霧進攻直逼城下分三路總兵雙來乘勢徑撲北門  
陳勝由觀音山進攻法海寺賊巢皆克之賊復添築

土城於東面之五臺山一帶三十日大軍復分三路  
進攻勝保首先衝入由南路繞至西路攻其土城哨  
樓悉毀之又燒廿四橋賊營三座雙來攻北門亦毀  
賊營四座自是賊之外援悉絕但謀重閉矣

五月閩浙總督慧成署漕運總督查文經左副都御史  
雷以誠等分營於灣頭鎮陳家港萬福橋城圍始合

粵匪紀略

慧成率宣化諸營由東河赴揚州查文經率漕標徐  
州鎮各兵參將馮景尼師長鑣率壽春勇淮勇繼至  
分營東路之灣頭鎮南路之陳家港雷以誠請廣延



豪俊捐資招募自成一軍營於東路之萬福橋

總兵雙來鹽知事銜張翊國率兵攻城城垂克援師不

至而退

平定粵匪紀略

雙來用礮轟塌城垣數處與張翊國由浮橋進兵分  
布雲梯登城殺賊勢已垂克賊乃自焚倚城板樓烈  
燄薰騰我軍不得下復無救援乃撤兵回營

賊據瓜洲內閣中書鍾淮等力戰死之

平定粵匪紀略

賊分據鎮江揚州以瓜洲下虹橋為往來要衝紳士  
侍讀銜內閣中書鍾淮團勇於虹橋殺賊甚眾五月  
二十九日復與江口水師會攻正接戰風忽轉艇師

驟退淮與已革揚州營守備方剛力戰陣亡團勇仍

扼虹橋以守

賜卹如例並入祀昭忠祠

瓜洲營兵童勝林王有信錢松年徐得勝葛永春徐  
連方李貴於五月初三日在瓜洲王家橋等處陣亡  
毛必祥陳永福潘楷傳得元張起貴於五月十九日  
在瓜洲羅家橋等處陣亡

衛千總福陞萬清彭馨記名外委朱定國俱接仗陣亡  
楊月桂山西渾源州人候補衛守備在揚隨營效力奉  
委解送火藥六月十五日行至瓜洲遇賊接仗斃數



名賊大至被戕死兩江總督奏案

李加德瓜洲營把總記名千總六月十五日在虹橋本汛領兵接仗受傷陣亡 給雲騎尉

瓜洲營馬兵常朝華六月十五日在斜高家田陣亡

虹橋鄉團丁三十名陣亡張一清倪源興卞維琳夏

元泰夏元宏趙源長王迺貴謝三慶張正琪張正心

王金山蔣長樂張占春朱廣隆周長福王恆祥湯恆

興季玉珩王兆餘許戚董昌董樹本孫福奎唐得龍

唐元貴殷起亭季朝貴倪在春孫有甲梁有仁見兩江忠

義局案

按虹橋雖屬江都而鍾淮為本城紳士例得備書

同時殉節諸弁勇未便任其湮沒故並錄之

六月東路造樓船攻城總兵雙來陣亡平定粵匪紀略

參將師長鏢以樓船載兵泊便益門設籠渡兵以代

雲梯既渡登城賊見無後應乃放火焚船不果登總

兵雙來攻北城右駁中礮兵勇負出重圍昏迷中猶

大呼殺賊越日遂死時慧成等預遣參將馮景尼伏

兵東岸以待長鏢船至而景尼兵無一至者

刑部侍郎雷以誠創議捐收釐金助饟平定粵匪紀略

副都御史雷以誠擢刑部侍郎幫辦大學士琦善軍



務時揚州大軍四集饗不支以誠議收釐金以贍軍  
饗各省釐捐自是始時有赦回遣犯錢江獻策大言  
欺妄始則冀收為用後察其形蹤詭異殺之邸鈔

冬十一月賊退併據瓜洲揚州收復平定粵匪紀略

我軍攻城急江甯賊酋遣偽丞相賴漢英奔奪三汊  
河糾合儀徵賊黨來援由東路直犯揚城二十七日  
城中賊眾全股突出合賴漢英之黨退入瓜洲

耿元平銅山人徐州中營把總奉調揚州防勦十一月  
十四日出隊三汊河與賊接仗陣亡 給雲騎尉兩江

總督奏案

徐州營兵縱系廷蔣永標王興邦張文德郭殿元王彥  
明謝成功陳榮祖張鵬魁於十一月十四十七二十  
四等日在三汊河俱力戰陣亡

四年春二月揚州軍追勦瓜洲賊總兵瞿騰龍陣亡平定

粵匪紀略

總兵瞿騰龍率兵由瓜洲西岸進勦初五日賊傾巢  
出鬪我軍兩岸衝突賊紛潰殲斃二百餘人騰龍下  
馬步行持刀殺賊數十人以深入遇害揚州接仗陣  
亡者尚有山東高唐營遊擊華雲龍署陝西漢中佛  
坪營守備周玉喜直隸提標城守營把總杜芬直隸



長垣營遊擊白含章守備李自珍

民勇劉才鍾毓靈趙正源薛賢才葉廣蘭丁玉山束正官陳元祿彭延芝丁長志王加得葛福虎孫朝得王發高黃致和黃致鈞等均於三月在虹橋陣亡

團丁錢松年周福先周殿邦王有信陳永福陳宗祖呂貴張金標葛永春葛福霈韋朝華常朝華童勝林徐得勝徐連芳束正武邢安等均於五月在虹橋陣亡

兩江忠義局案

夏六月琦善卒於軍江甯將軍托明阿代之

平定粵匪紀略

秋閏七月揚州軍擊賊於瓜洲敗之

欽差大臣

向榮兩路夾擊直搗賊巢所向披靡江甯賊眾飛樂

五年春三月揚州軍擊賊於江口勝之

自揚州克復後賊於鎮江瓜洲勾連負壘為犄角之

勢二十八日賊眾逕撲大營時托明阿未至提督陳

金綬遣副將鞠殿華侍衛穆克登額德興阿分途迎

拒斃賊千餘賊鋒大挫

冬十月揚州軍大破賊於浦口賊壘悉平

平定粵匪紀略

賊於金陵對江九洲洲下之浦口排木為柵聚石築

壘冀梗我師將軍托明阿密約



北固山鎮江瓜洲金山四路賊約期進犯托明阿設  
伏迎擊破之復與浦口水師會擊焚賊船三百有奇

冬十一月揚州軍於瓜洲外築長圍成平定粵匪紀略

揚州軍與瓜洲賊眾相持已二年瓜洲與鎮江一水  
相望兩城賊眾往來無阻並時有合竄揚州圖北犯  
意托明阿諭士民捐築長圍於瓜洲北以扼之賊分  
水陸來撲我軍擊走之

六年春正月揚州軍敗賊於瓜洲平定粵匪紀略

瓜洲賊屢出衝突金陵賊分大隊援之托明阿檄副  
都統德興阿都司趙樹棠擊賊於土橋尹家橋勝之

援賊亦受創去案另錄

顧鎮海江都人候補把總記名千總正月帶勇三十名

在北門守禦賊至接仗受傷陣亡 給雲騎尉兩江忠義

局案命欽差英阿於瓜洲擊賊宜輝擊香

三月瓜洲鎮江賊合攻揚州城陷知府世焜力戰死我  
軍進勦旋復揚州平定粵匪紀略

鎮江瓜洲之賊糾合北犯金陵賊又撥大股助之初  
一日突陷府城知府世焜力戰捐軀江甯將軍托明  
阿提督陳金綬侍郎雷以誠皆奉

旨革職加德興阿都統銜為



欽差大臣督辦揚州軍務並以少詹事翁同書幫辦軍務督飭

總管西昌阿等敗賊於陳家橋轉戰皆捷賊潰遁十

三日收復揚州本城紳士內閣中書吳文鑄等請建

世焜專祠奉

旨准於殉難地方建立專祠

內閣中書吳文鑄等請建世公專祠稟云竊以見危

授命允垂英烈於千秋臨難捐軀宜報馨香於百世

此在

聖代褒功之厚

卹典已備哀榮而極黎民戴德之誠公論必綜名實查前

署揚州府知府世焜幼稟異質長歷華資策名已冠

夫膠庠筮仕先膺乎部務迨夫一麾出守理煩要而

卓著循聲三事在公經盤錯而久書上考自賊騎發

端於楚粵遂妖氛接踵於瓜儀揚州當十省之通衢

為三江之保障疆隅殘破非復士馬之精妍城郭蕭

條但見人民之塗炭遠溯下車之始甦民困而起瘡

痍允推折獄之才清盜源而除荆棘好賢禮士懷才

者習爾韜鈴練勇團兵敵愾者修我矛戟行見士民

復業里閭安居孰意劫運未終戰氛復熾土橋失守

邗郡戒嚴狼烽起楊子橋邊梟虜集安江門外公卽



誓師泣血環甲登陴火器齊施已見羣克倒馬瑯旗  
遙指共看殘寇輿尸俄而醜類鱗奔渠魁麤至譙樓  
騰沸城闕傾頽維時獨力難支孤忠自矢裹創巷戰  
猶持半段之槍勢面衝鋒尙發連珠之箭胡青驄之  
蹶足遂白刃之交胸甲士潛逃誰漉萇宏之血賊徒  
羅拜願歸先軫之元可謂城亡與亡獨標忠悃者矣  
某等素沐仁恩景懷大節論平日推崇循吏已堪立  
懦廉頑及今茲荆建專祠愈足移風易俗擬於揚郡  
適中之所庀材蠲吉度地鳩工並擬將同時殉難之  
署揚州府同知朱守讓三年殉難之江都縣教諭黃

元灝以及在城死事之官紳士女一併附祀仰遵  
國典用闡幽光俯順輿情特隆祀事爲此合詞公籲電情  
核轉據實通詳俾得早荷

綸音永崇綽楔妥英靈於地下春秋之祈報維虔昭氣節於人

間淮海之忠貞益勵

按世焜例當有傳而事蹟未詳錄此以存其概

浙齡字雲濤署揚州府同知丁內艱卸事甫三日賊至

遇害

續揚城  
殉難錄

朱守讓字石祿候補通判署揚州府同知粵匪再至偕  
太守世焜守城分赴各門用蒲包實土塞城穴水關



方思背城一戰而刃已及身疊受多傷倒入河內而殞

張魁字星聯永安鎮人廩貢生鵬程之子補南河江防營汛千總六年正月奉檄帶勇駐揚州二月二十九日賊猝至魁率勇隨知府世焜與賊戰於埂子街力竭捐軀事

聞給襲雲騎尉長子書年承襲

程餘熊儀徵人都司銜三月初一日在三汊河拒賊陣

亡

兩江忠義局案

孫寶恆甘泉人六品軍功三月在揚州城外與賊接仗

受礮陣亡

冬十一月揚州軍擊瓜洲賊勝之勦平高旺賊黨

平定與粵匪

紀略

賊踞江浦瓜洲遠近亡命多依倚為逋逃藪來安天長閒土匪竊發假其聲勢嘯聚高旺圖北竄德興阿遣總兵羅玉斌禦於小東店遊擊魁霖等督步隊由東西葛進勦總兵台斐音保等督馬隊分捕餘黨諸路皆捷盡殲賊之踞高旺者而瓜洲援賊亦為總兵鞠殿華分兵擊破之毀賊望樓營柵俘斬三千餘人七年春正月揚州軍擊敗瓜洲撲營賊水陸並捷

平定粵匪



略紀

瓜洲賊分途出撲大營德興阿檄參領富明阿總兵  
鞠殿華副將陳國泰迎勦連奪要隘沿河賊艇亦為  
水師總兵周上法擊覆

夏四月揚州軍大捷於瓜洲

賊又分水陸並撲大營德興阿遣富明阿擊之於土  
橋鞠殿華擊之於四里鋪均獲捷其水路之賊以大  
船數十分兩路進亦為水師所敗計俘斬一千三四  
百人溺水死者甚多

冬十一月揚州軍克復瓜洲 平定粵匪紀略

賊眾據瓜洲五年憑險負隅遙聯金陵近接鎮江阻  
我軍進勦之路德興阿激勵將士定期進攻適賊援  
之在南岸者挫於提督和春援路已絕遂於十二日  
率將士四面圍勦踰土城而入殲斃千餘人蹋平賊  
壘五座其登舟南竄之賊被艇船截擊溺斃無遺瓜  
洲遂復江南軍亦同日克復鎮江府城

八年秋八月浦口大營潰江北糧臺移至城外淮揚道  
郭沛霖請援於各路 郭沛霖日知堂筆記

二十日偽英王陳玉成自上游會九洑洲羣賊越江  
浦撲浦口大營德興阿士卒潰散過儀徵揚州北奔



瓜洲郡城震驚居民紛紛遷徙江甯藩司楊能格時  
辦江北糧臺移軍裝器械火藥於城外五臺山復移  
至邵伯鎮三十日德興阿由瓜洲退至沙頭復營於  
五臺山糧臺又移至六開賊由天長竄至甘泉山德  
興阿復退走萬福橋賊鋒漸逼城下淮揚道郭沛霖  
時駐揚州辦理籌防善後事宜督率民圍擇要扼守  
通稟各路請撥援兵見平定粵匪紀略  
並日知堂筆記  
晏鵬舉寶應人五品藍翎江南督標儘先把總八年口  
月初八日在灣頭鎮一帶接仗殺賊多名旋以賊眾

蜂擁被圍於五臺山身受重傷力竭陣亡兩江忠  
義局案

九月賊陷揚州日知堂  
筆記

自浦口兵潰至揚州被圍郭沛霖八次通稟請各路  
援師解圍初三日賊眾麇至援兵未到城遂陷

泰州州同周濬山東人八年奉調來郡助守城陷不屈  
死之

江都縣典史王元熙山東人以緝捕敘功保獎藍翎八  
年九月城陷時寓北柳巷吳宅冠帶至大東門遇賊  
被戕

江南軍會北軍克復揚州



賊陷城後焚掠西北鄉欲由黃珏橋犯邵伯警報至  
江南江南提督張國樑率兵渡江十四日夜挑選精  
銳攻城之東南賊眾出撲國樑率遊擊馮觀勝黃靖  
分路截殺城不及閉守揚州將鞠殿華成明富明阿  
率軍會攻淮揚道郭沛霖督府縣營汎帶領團勇亦  
相繼驟進十五日克復府城次日移師攻儀徵縣城  
亦克之

有民勇姚三周德佩吳從懷曹步雲曹允剛徐義亭  
秦松柏曹魯珍徐福成劉永金馬勇朱得勝姚振福  
王林王殿楨劉心一葛文魁張維金王景時陳玉龍

薛元靈易文周林之俊雷善海馬心盛曠起祥李文  
盛張學梅王自芳張夢松張名煥陳允名魏中五等  
禦賊陣亡姑錄於此

冬十月德興阿奏劾江甯藩司楊能格淮揚道郭沛霖

均落職

即鈔

九年秋七月德興阿劾罷江北不復置帥

德興阿師久無功爲

欽差大臣和春奏劾江北軍務改歸和春兼轄

冬十一月江南軍壘破江浦逆壘提督李若珠移師駐

揚州

平定粵  
匪紀略

增修甘泉縣志

卷之五

事略

七



自浦口官軍失利賊東伺儀徵揚州西逼江浦南窺  
溧水克燄復熾和春派李若珠渡江接防進攻六合  
平毀江浦西北逆壘二十餘座時六合援賊竄踞紅  
山窰截大營後路進圍提督李若珠營糧盡援絕若  
珠率兵突出重圍移駐揚州西路

十年夏四月賊犯揚州大軍擊卻之

平定粵匪紀略

天長六合之賊乘間竊發一由陳家集犯揚州一由  
東溝窺瓜洲一由僧道橋編筏偷渡襲邵伯提督李  
若珠檄副將王萬清統艇師由邵伯湖堵勦參將詹  
啟綸從三汊河抄擊副都統海全出揚獸醫壩副將

劉成元出陳家集疾趨會攻毀平逆壘斃賊無算賊  
退據陳家集

甘泉練勇二十七名於四月禦賊陣亡練董陸堯年  
李秀蘭楊哲元陸九華陳景坤王志和李桂祥六品  
軍功毛瑞勇目魏慕雲邱英榜余七扣金湧子劉小  
八馮意林馮順林馮元林黃正泰李五丁在山丁連  
山徐慶春謝良臣秦宏朱長山楊文鑑周四馮開昌  
見漕督奏案

團丁五名於四月在公道橋禦賊陣亡楊裕元馬大  
發湯標夏升楊寶見兩江忠義局案



團丁二十一一名於四月在公道橋談家集送駕橋一帶與賊接仗陣亡錢長和李伍李得明王參馮開銀馮開金馮開易許天長呂裕德張起貴張福基張金山金文連潘楷于長有傳得元姚山毛必祥毛端徐慶國紀國慶見兩江忠義局案

五月薛成良叛擾揚州旋就殄滅奏續

成良即降賊薛老小原名三三初為賊目據江浦縣咸豐九年受降奏更今名以協勦功洊升游擊隨總兵李若珠攻勦九洑洲賊壘十年五月突率所部東犯揚州由仙女廟邵伯沿河竄掠計圖擄奪民船沂

官督

湖西竄天長遁歸老巢句結捻逆經團練民勇會合官兵登時兜勦殲斃羽黨甚眾副將王萬清駐紮邵伯率師進勦入湖生擒成良梟示

六月都察院副都御史晏端書奉

命為江北團練大臣江北民團統歸節制鈔

先是捻匪於二月竄陷清江粵賊於三四月間連陷蘇常兩郡江北軍情危急故有是

命幫辦團練則為淮徐道吳棠時捻蹤西逸清江解嚴淮安以

西徐海各屬奏歸吳棠督飭練董築圩防禦淮安以東揚通各屬濱臨江湖在在險要且裹下河完善之



區賊伺已久晏端書駐紮淮安並於邵伯分設公所  
督率官紳設局集團訓練親赴各城鎮周歷仙女廟  
邵伯兩鎮阻河為界乃裏下河屏蔽挑選精壯勇丁  
協助官軍扼堵俾免侵越復奏留在籍候補道徐曉  
峯督修沿江禦潮長隄二百餘里布率勇丁以固江

防

團練  
奏案

秋八月荊州將軍都興阿督師駐揚州

平定粵  
匪紀略

督辦江北軍務提督李若珠病不能軍荊州將軍都  
興阿奉

旨督辦江北軍務九月至揚州營於東關門外五臺山

十一年夏四月揚州軍擊賊獲勝

江皖各賊合黨分股竄撲揚州一出僧道橋一出儀  
徵均為已革總兵王萬清等迎勦擊退至十八日餘  
黨復聚競奔西北鄉搶築卡壘二十一日都興阿飭  
營總杜嘎爾游擊刁經明分途迎勦大敗之追殺三  
十餘里斃賊數千踏平甘泉山等處賊壘數十座  
同治元年二月粵賊繞竄邵伯湖西副將王萬清擊退  
之

粵賊復糾黨圖撲揚州都興阿先於城外築壘扼截  
賊不得逞分股繞竄邵伯湖西一帶副將王萬清駐



防邵伯帶隊越河三道迎勦總兵黃開榜亦於高郵湖濱派隊環紮阻賊去路始各潰遁時南北交警高郵邵伯介居其中相距僅百餘里民情洶洶晏端書由鹽阜回駐邵伯督飭練勇民團二萬餘人密布運河東岸長堤巡邏防護竭三晝夜之力甫就安貼

三月揚州軍擊退渡江賊眾

平定粵匪紀略

賊由金陵下擾糾合蘇常之眾十餘萬人渡江撲揚州都興阿知賊眾且銳嚴戒各營勿輕出戰俟賊至登壁擊之殺傷甚多退赴各鄉掠食十三日我軍至徐家集等處誘賊出壘殲戮四百餘人十六日賊由

法海寺至虹橋七里店等處排列長陣都興阿率師直趨虹橋進攻又飭副將左起龍等由三汊河抄擊斃賊千餘十七日賊復以洋鎗隊衝至西門外列於河西副都統海全迎擊眾寡不敵死之副將刁經明等鳧水往攻都司廖長明率驍騎營五百人奮勇衝遏賊始漸退復派隊分路攻擊賊退儀徵

夏四月揚州全境肅清

平定粵匪紀略

賊退儀徵後仍分眾四出掠食十一日我軍出隊連敗賊於儀徵北路十二里盆等處其竄擾沙漫洲之賊經水師分路截勦賊計窮遠竄揚境肅清



五月水師移駐三江營

平定粵匪紀略

江南提督黃翼升奉

旨統水師東征於五月閒下駛以二營駐浦口以四營駐三江

營

四年夏五月揚防凱撤

是歲釐稅所入益短紕軍士月止半饗江甯克復浙

江巡撫曾國荃所部軍既凱撤兩江總督曾國藩江

蘇巡撫李鴻章思裁軍節饗會疏請撤揚防之軍

詔從之

六年冬十二月粵賊賴汶光猝竄揚州城外運使李元

華會同候補道吳毓蘭等迎擊之生擒汶光公牘

汶光為粵賊渠魁道光三十年金田作亂汶光即與

其列會擾安徽河南陝西湖北江蘇山東六省同治

三年江甯克復後汶光逃至山東糾集餘賊合捻匪

四竄本年十二月初八日由山東濰河西岸竄過六

塘河並擾清江鹽河十二日竄至仙女廟邵伯鎮時

運司李元華偵知賊情窮蹙商請候補道吳毓蘭統

兵自五臺山與提督張元龍總兵陳東友會議追擊

並分路馳勦雨夜昏黑追汶光至瓦窑鋪擒之復飭

所部就各鄉嚴搜餘黨盡殲戮之



許銘勳字竹薌邵伯人父增篤行好施予里中稱為長者銘勳由附貢中同治元年順天舉人援例候補內閣中書以親老乞養在籍賴汶光由淮浦敗竄經邵伯詐稱官軍不受盤詰銘勳知其為匪率家丁禦之不敵被殺陳萬亦死汶光就擒後事

聞贈銘勳知府銜世襲雲騎尉長子瀾廩生承襲

以上節錄府續志並參以新採

汶光於咸豐二年率眾入魯州四縣北至濰山東六省同前  
 次次於魯州縣城圍攻三十平金田莊爾好光明與  
 朱會同討捕首吳德蘭等賊擊之至封好光



